

雙  
槐  
歲  
鈔

二







雙槐歲鈔

(二)

黃瑜撰

# 雙槐歲鈔卷第四

## 聖子神孫

永樂閒國勢安於泰山。人心逾於拱極者。以有聖子神孫也。仁廟在東駕。一日侍側。上問今日說何書。以論語和同章對。因問何以君子難進易退。小人易進難退。對曰。小人逞才而無恥。君子守道而無欲。又問小人之勢長勝。何也。對曰。此係乎上之人好惡。如明主在上。必君子勝矣。又問明主在上。都不用小人乎。曰。小人果有才不可棄者。須常警飾之。不使有過可也。上喜其學問有進。諭右春坊大學士黃淮左諭德楊士奇曰。爾等其盡心輔之。端午節。車駕幸東苑。觀擊毬射柳。聽文武羣臣四夷朝使。及在京耆老聚觀。自皇太孫而下諸王大臣。以次擊射。太孫擊射連發皆中。上大喜。射畢。嘉勞之。因曰。今日華夷畢集。朕有一言。爾當思對之。曰。萬方玉帛風雲會。太孫卽叩頭對曰。一統山河日月明。時年十五矣。上喜甚。賜名馬錦綺諸番物。遂命儒臣賦詩。大宴羣臣。盡歡而罷。夫燕翼貽謀。始自蒙養。而昭皇之臨下。仁聲洋溢。章皇之馭寓。義問宣昭。具見於此矣。故特書之。

## 詩歌純粹

仁廟潛心經學。禮重宮寮。文倣歐陽。詩尙選體。宣廟承之。天資穎異。製作如廣寒殿記之類。雖鉅儒莫及。詩歌詞理尤純粹。敬鈔數首以概見之。招隱曰。天之生賢。道蘊厥身。幼學壯行。致君澤民。伊傅孔孟。皆古

君子孜孜行道。未嘗忘世。秦漢之衰。以退爲賢。絕類離倫。豈非遠天。嗟哉若人。於世奚補。區區百年。草木同腐。予嗣祖宗。統臨萬邦。求賢圖治。宵旰遑遑。羣才偕來。布列在位。道行身尊。皇世之貴。緬彼山林。豈無遐遺。往而不來。悠悠我思。漱石枕流。遠引高蹈。雖逸其身。而悖於道。卷阿之詩。梧桐鳳凰。爾其幡然。予將爾揚。望崇文閣。曰。峴崇文閣。乃在城北隅。登高一睇。望輦飛切雲。衢其上。何所儲。千載聖賢書。其下何所爲。衣冠講唐虞。國家久興學。側佇登俊儒。願此閣下人。勉哉惜居諸。鳳凰臺歌曰。亭亭鳳凰臺。乃在城南端。秦淮西流。遶其下。鍾山石城。龍虎盤。昔宋元嘉中。傳聞下三鳳。粲粲五色毛。百鳥爲之從。乍來忽去。今幾秋。寂寞高臺成古邱。梧桐零落篁竹晚。澹烟芳草天悠悠。吁嗟鳳凰。乃靈鳥。虞周以來。見應少。偶然一出。鳴此山。遂有聲名著江表。嘗聞唐世御史陳嘉謨。朝陽鳴鳳。衆所譽。逝將築臺禮賢士。庶有昌言日。起予。燕餞少保大學士黃淮於西苑。賜歌曰。天香早折仙桂枝。筆花五彩開鳳池。蓬萊芝山直奎壁。近視九重天咫尺。永樂聖人臨御初。鞠躬稽首陳嘉謨。仁皇監國文華殿。左右謀猷共羣彥。朕承大寶君萬方。相與共理資賢良。傾心寫情任舊老。而卿引疾先還鄉。五歷星霜復相見。霜鬢蕭蕭秋滿面。是時朝旭光升紫殿明。相對清言良慰情。留之累月未盡意。歸心又欲東南征。太液清泠涵碧藻。楊柳芙蓉相映好。鳧鷖鸕鶿弄澄波。紫霧紅雲拂瓊島。芳殺在俎酒在壺。工歌鹿鳴續白駒。君臣大義士所重。心須廷闕身江湖。雁蕩峯高青不極。中有謝公舊遊迹。採芝斲荅可長年。應在天南憶天北。淮歸刻諸石。作奎文亭覆之。尤多六言。過史館曰。蕩蕩堯光四表。巍巍舜德重華。祖考萬年垂統。乾坤六合爲家。上林春色曰。山際雲

開曉色。林閒鳥弄春音。物意皆含生意。吾心允合天心。二詩家傳人誦。京師有石刻摹本。又詠撒扇曰。湘浦烟霞交翠。剡溪花雨生香。掃却人間炎暑。招回天上清涼。與前作一視同仁氣象。真帝王之言也。

### 文淵閣銘

宣廟御製文淵閣銘。有敍曰。古昔帝王之有天下。旣建朝堂以聽政。則必有怡神養性之所。萃天下之書。延天下之士。相與講論道德。而資啓沃焉。我太祖皇帝始創宮殿於南京。卽於奉天門之東。建文淵閣。盡貯古今載籍。置大學士員。而凡翰林之臣皆集焉。萬幾之暇。輒臨閣中。命諸儒進經史。躬自披閱。終日忘倦。以天縱之聖。加日新之學。道德之懿。仁義之實。充然洽於天下矣。太宗皇帝肇建北京。亦開閣於東廡之南。爲屋凡若干楹。高亢明爽。清嚴邃密。仍榜曰文淵。其設官一如舊制。分南京所藏之書。實其中。自六經之外。諸史百家。靡不畢備。其所以明道興治。以繼先志而裕後嗣者。規模宏遠矣。予承皇考仁宗昭皇帝丕緒。嗣守列聖洪業。夙夜兢惕。罔敢怠遑。思惟經以載道。史以載事。百氏之文。亦所以羽翼斯道者也。於是聽政餘閒。數臨於此。進諸儒臣。講論折衷。宣昭大猷。緝熙問學。庶幾日就月將。造乎其極。上可以承祖考付托之重。下可以福黎庶。而慰其仰戴之心。而斯閣之傑然者。亦光遠有耀矣。乃爲之銘。銘曰。於昭天文。燦壁奎。國家書府。此其儀文。淵之閣屹巍巍。古今載籍。靡有遺。三王二帝。軒與義。文章道德。後世師。祖宗聖學。於緝熙。輔相天地。福黔黎。神而明之。咸在茲。肆予承統御華夷。善繼善述。敢或墮。聖經賢傳。乃所資。萬幾之暇。樂忘疲。上紹列聖之宏規。下使兆姓皆恬熙。刻銘茲閣。萬世貽。斯文不闕。天相之。觀聖言。

則閣爲天子講讀之所。非政府也。故列筵側坐。而虛其中。以俟臨視。洪武中。代言修書授諸王經者。皆在而戶曹張賞。賜次於旁。用備賚予。永樂初。命侍讀解縉等七人入掌密勿。凡行移稱翰林院內閣官傳旨。條旨。則與尙書蹇義。夏元吉同事。而學士王景輩不與焉。縉等遷至大學士。惟胡儼尋擢祭酒。庚寅二月。儼兼侍講。再入閣。有詩云。承乏詞林愧不才。重承恩詔直芸臺。筵前視草頻封檢。帶得天香滿袖回。蓋詞臣入直之常爾。洪熙初。閣老皆躋保傅。參預幾務。惟在北京宣德時。臨視至再。始設庖廚。不復退食於外。而出掌部者不再入。正統初。開經筵於文華殿。聖駕自是罕至。傳旨則中官專之。惟條旨墨書小票。司禮監用硃批出。閒有依違。而他官不與。迨徐武功李文達掌文淵閣事。始以政府視之。人亦稱爲宰相矣。

太孫侍從

宣廟年九歲。出閣就學。時永樂丁亥四月也。命姚廣孝及翰林待詔魯瑄鄭禮等講讀。尋召前禮部郎中兼贊善李繼鼎說書。不置寮屬。明年冬。令文武大臣內閣及東宮官兼輔導之任。時儀智謫役通州。召爲禮部左侍郎。始授經焉。太孫呼爲先生而不名。壬辰春。命兵部遣人往兩直隸江北河南山陝荆蜀。選良家子弟。年二十以下。勇健有材藝者。充隨從。太孫學問之暇。講習武事。自是時常出獵。上聞進士高等戴乾劉紳饒安三人在翰林修書。簡紳爲禮科給事中。又聞國子學錄王讓孝於其親。而吏科給事中張瑛善說書。皆使侍焉。智以年老。薦同鄉訓導戴綸。卽擢禮科給事中。尋用吏科給事中陳山。庚子九月。擢教授蘭從善。林長楸。教諭徐永達。俱編修。教諭張昱韓軸劉順俱國子博士。紳坐事。謫判九真。惟瑛綸山讓

從善長楸永達七人侍從授經。長楸力諫出獵。綸則疏言其非。初不知本文皇意也。及卽位。山爲戶部尙書兼謹身殿大學士。瑛爲禮部尙書兼華蓋殿大學士。讓行在吏部右侍郎。綸行在兵部右侍郎。從善學士。永達鴻臚卿。長楸鬱林知州。憲副宋立齋。端儀曰。長楸綸素強諫。不少詭隨。最爲宣廟所不樂。瑛山每順旨。以故大被寵信。初遣綸往鎮交趾。而長楸坐怨望。下錦衣獄。併出其弟刑部主事適節判慶遠府。及得綸所上疏。令長楸以罪連及。械綸至京師。置獄以死。綸諸父河南守賢。大僕卿希文。親族百餘口。被逮籍沒。長楸坐禁繫十年。正統初赦出之。仍守鬱林。而希文幼子被宮。賜名懷恩。後爲司禮太監。其隨從幼軍二萬餘人。隸府軍前衛。年至六十老疾者。兵部奏請疎放。仍於本州縣照名選補。

### 孝子擢大學士

孝子擢官者。洪武中。易州涑水縣民李得成。臥冰求母屍。舉孝廉。爲光祿大官署丞。後至布政使。永樂中。金吾右衛總旗張法保。刲肝及臂爲湯液。以愈祖母。擢尙寶司丞。南昌武寧縣民陳仲賢。刲肝及股。以愈其母。事聞。召至京。擢鴻臚司儀署丞。賜冠帶。馳驛歸侍。俱旌表其門。又有陞官者。石州學正鳳翔梁準。母喪。廬墓哀毀。有羣鳥飛鳴廬上。所種樹。有雀來巢。永樂丙申。有司上其事。擢爲均州知州。洪熙元年三月。壬申。陞前光祿寺署丞權謹爲文華殿大學士。謹。徐州人。自幼喪父。由求賢舉保。知樂安縣。移母就養。九年考滿。改署丞。患眼疾。記名放回。母病。顛天求以身代。永樂壬寅。母卒。廬墓三年。朝夕哭奠。不御酒肉。鄉人稱其孝。有司上其行。驛召至京。上曰。能孝者必忠。忠孝之人。可任輔導。遂超陞是職。俾侍東宮。謹。質實。



有操履。而文章非其所長。宣廟卽位。以其年老。改通政司參議。致仕。按文華殿大學士。在洪武中。惟上海全思誠。烏程張溥。至謹三人而已。豈非異數哉。

陳情願仕

洪武丁卯三月。國子生古樸。奏言家貧願仕。冀得祿以養母。上嘉之。除兵部主事。迎養就京師。永樂丁酉六月。潮陽縣儒士郭張善。自陳幼孤。賴繼母撫教。願出仕報効。上令翰林院試其文。可取。詔授檢討。觀此二事。則知祖宗所以教人孝者至矣。洪熙乙巳十二月。以呂熊爲行在兵科給事中。禮部尙書震之子也。震恃靖難時守城功。數於上前陳情。懇乞熊官。至於流涕。上不得已而與之。大爲士論所鄙。宣廟之寬仁如此。

端本策

宣宗初嗣位。漢中府學訓導李蕃。進端本策。其一。正君德。爲端萬化之本。其二。明儲輔。爲端萬代之本。其三。厚王國。爲端親睦之本。其四。重祭祀。爲端孝敬之本。其五。務農桑。爲端富庶之本。其六。崇學校。爲端教導之本。其七。慎銓衡。爲端黜陟之本。其八。擇守令。爲端牧養之本。其九。嚴風憲。爲端委任之本。其十。信賞罰。爲端政令之本。其十一。厲廉恥。爲端綱維之本。其十二。杜徼幸。爲端仕進之本。其十三。旌直言。爲端視聽之本。其十四。省玩好。爲端尙御之本。其十五。修武備。爲端捍禦之本。其十六。汰僧道。爲端習俗之本。洪熙元年六月也。上嘉納其言。擢兵科絕事中。予按洪武辛未。南豐縣典史馮堅。言九事。擢左僉都御史。二

人正堪作對。章皇之用人。視烈祖有光矣。

### 盧師二青龍

京城西平則門外三十里盧師山。相傳隋末盧禪師居山之祕魔巖。有青衣二童子事之。值旱投池中。化爲二青龍。天因大雨。其後有禱輒應。今東北山峽閒。小池嵌空。圓竇二尺許。水清澄。涓涓不竭。卽所蟄處也。洪熙初。久不雨。真人劉淵然輩。禱皆不應。遂往是禱焉。甘雨隨注。仁廟大說。詔封大青龍神曰宏濟。小青龍神曰靈顯。命禮部春秋仲月遣順天府官致祭。正統丙辰四月。翰林修撰周敍尹鳳岐習嘉言陳叔綱編修孫曰恭主事劉球洪璵約望日往遊。前期諗寺僧曰。二龍去留無常。近日大青見寺中。今尙在。至望可見而未敢必也。及期登山至寺門。僧羣譁曰。小青至矣。北入方丈。則二青皆盤旋佛座閒。僧曰。小青不見半歲矣。聞翰林諸公來而復集。昭其靈也。衆稱異者久之。往尋所蟄處。復至祕魔巖。又東過清涼寺。遂下山而返。回望山有雲氣。抵京城。雨大至。乃取唐人香閣披青磴。瑠臺控紫岑爲韻。分賦一詩。而敍記其事如此。

### 臺官占后星

永樂丁酉。皇太孫將婚。臺官奏后星直魯分野。時濟寧胡榮有長女善圍。爲女官。授錦衣衛百戶。遇例免歸。第三女善祥。居小樓。每旦紅白氣縹緲遶戶。彌月。里閭聚觀。以爲瑞。至是太監黃琰馳驛至魯。果與選焉。彭城伯偕其母亦受命選妃。抵河南永城。以縣簿孫忠第四女應命。忠鄒平人也。直齊分野。女美在胡

上然竟冊胡爲妃以應占而孫次之宣廟卽位胡爲皇后孫爲貴妃榮自光祿卿擢都督僉事而忠以序班超擢與榮同尋賜孫以金冊金寶示寵異也宣德丁未孫誕長子胡上表讓位退處別宮號靜慈僊師而孫正位中宮越三年封忠會昌伯追贈三代焚黃還上偕中宮夜幸其私第慰勞之張太后憐胡賢德令入居清寧宮燕饗必居孫上正統初張太后爲太皇太后孫爲皇太后胡遜處其下八年胡痛哭太皇成疾十一月殂以嬪禮葬西山天順中孫太后崩母儀天下凡四十餘年而胡始追諡恭讓誠順康穆靜慈章皇后計其在后位僅二年爾臺官之占固未盡驗也故曰人道邇天道遠

都堂先兆

蘭溪邵都憲。宣德中掌南京都察院奉命考察御史黜其不肖者二十餘人。旣明且公。與北院顧公佐齊名。先是左都御史陳瑛以酷誅。右都御史劉觀以貪誅。然猶効尤成風。賊穢狼籍。至是憲臺爲之廓清。瑛少孤力學。每日黎明赴館。嘗過厲壇。聞其中啾啾馳驟。一鬼叱曰。邵都堂來矣。尙擾攘耶。心私識之。一日渡西門河。大風覆舟。獨爲水漂至岸而免。甫起時。有物負其足。旣登岸視之。屍也。收而瘞之。夜夢來謝曰。感都堂厚恩。其先兆如此。永樂丙戌登進士爲御史。宅母憂時。哀毀盡禮。所居產芝者再。歷官陳臬。所至有聲。蓋孝廉人也。

秦新名諱

秦始皇名政。諱正月。晉征。至今因之不改。宋仁宗名禎。諱貞爲正。如貞觀則曰正觀。貞元則曰正元之類。

是也。易世之後。無復諱之者。豈仁宗之仁。不及秦政之暴邪。王莽下令天下不得有二名。雖匈奴單于囊知牙斯。亦改其名曰知。東漢君臣。迄於三國。皆因之。後魏孝文帝變夷從夏。凡虜複姓。皆更易以倣中國。如拓跋則爲元氏之類是也。曾未幾何。而恭帝已復拓跋氏矣。宇文周出而盡復之。甚或更高歡氏賀六渾。楊堅氏普六茹。計孝文之令。僅行於數十年間。曾不若新莽之遠也。以臣篡君者。乃行於外夷。用夏變夷者。反不能行於中國。二者皆愚所未解也。以此言之。因襲之弊。曷常分別善惡哉。鄉俗鄙習。牢不可破。先王典禮。廢而不行。大抵類此。

### 宋元倫理

倫理莫大於君臣父子。此而不明。何以爲國。宋理宗無子。以母弟嗣榮王與芮子禔爲後。卽度宗也。旣卽位。加與芮武康寧江軍節度使。依前太師判宗正事。咸淳三年。上太后尊號。冊封后妃。然後與芮進封福王。主榮王祀事。五年。加食邑一千戶。此外無殊禮矣。度宗入繼。與漢安帝同。然清河王慶薨。在安帝卽位初。與芮則宋亡後。猶在。子爲君。父願爲臣。無乃舛與。史記舜踐帝位。載天子旗。往朝父瞽瞍。雖禪繼不同。然用伊川濮議。尊爲福國太王。朝用家人禮。則善矣。皇太子國之儲貳。必君之嫡長居之。然後名正言順。唐不師古。以爲追贈。是以官爵視之也。岐薛本兄弟爾。乃謚以太子。甚爲無謂。然猶行於旣沒也。胡元武宗文宗。皆立其弟爲皇太子。倫理何在。民俗化之。彝倫不斁。故高皇帝禁約榜文曰。以弟爲男。不思弟之母。是何人於乎。人倫至我朝。真大明之世哉。

經書對句

宋人制誥章表四六駢儷。多用經書句。謂之天生自然對。如天維顯思。民亦勞止。惟女一德。于今三年。有能奮庸。爰立作相。行此四德。弼予一人。文王之德之純。周公之才之美。皇極錫五福。大臣慮四方。閒暇而明政刑。會通以行典禮。禮樂自天子出。籩豆則有司存。於緝熙單厥心。念終始典于學。欣欣然有喜色。蕩蕩乎無能名。睦族以和萬邦。明倫以察庶物。率百官若帝之初。於萬年受天之祜。發號施令罔不臧。陳善閉邪。謂之敬。知微知彰。不俟終日。有嚴有翼。以奏膚公。上帝臨而無貳。無虞三事就而不留不處。聞俎豆未學。軍旅之事。聽鼓鼙則思將帥之臣。兵於五材。誰能去之。臣無二心。天之制也。竄聰明而有作。不作聰明。由仁義以安行。非行仁義。玉帛萬國。干舞已格於七旬。簫韶九成。肉味遽忘於三月。夙夜浚明。入則宣其三德。文武是憲。出則揉此萬邦。五百里采。五百里衛。外包有截之區。八千歲春。八千歲秋。上祝無疆之壽。皆膽炙人口。至於詩句。如公獨未知其趣耳。臣今時復一中之。我覺魏徵真嫵媚。人言盧杞是奸邪。天之未喪斯文也。我獨何爲不豫哉。何以報之青玉案。我姑酌彼黃金罍。此即可資一笑爾。

銜甲吐卷

偶讀隋書多四六句。如曰銜甲示於姬壇。吐卷徵於孔室。不知何謂。蓋詩疏言文王受命云。季秋之月甲子。赤雀銜丹書入豐。止於昌戶。再拜稽首受。又拾遺記云。孔子生之先。有麟吐玉書於闕里人家云。水精之子。系衰周而素王。徵在。以繡紱係麟角。豈其謂是邪。他如羲皇出震。觀象緯而法天。史頡佐軒。察蹄迹

而取地兼三才而建極。一六合以爲家。雞樹騰聲。鵝池播美。東探石匱之符。西蠹羽陵之策。山藏美玉。光照廊廡之閒。地蘊神劍。氣浮星漢之表。茂陵謝病。非無封禪之文。彭澤遺榮。先有歸來之作。學無半古。才不逮人。適鄆郢而迷途。入邯鄲而失步。枉高車以載駸。費明珠之彈雀。視漢臣之三篋。似陟蒙山。對梁相之五車。若吞雲夢。御璇璣而七政辨。朝玉帛而萬國歡。龍逢投軀於夏癸。比干竭節於商辛。申崩斷臂於齊莊。宏演納肝於衛懿。祁大夫之舉善。良史以爲至公。臧文仲之蔽賢。尼父譏其竊位。智侔造化。二儀無以隱其靈。明同日月。萬象不能藏其狀。峻五岳以作鎮。環四海以爲池。稟潤天潢。承輝日觀。威蕤先路。鳥奕渠門。雨施雲行。四時所以生殺。川流岳立。萬物於是裁成。皆造詞綺麗。如今表判。蓋承六朝之遺習。而風雲月露。正自不免也。銜甲吐卷四字尤奇。

### 典史大魁

宋制進士先有官者。當爲狀元。必遜寒賤。徽宗時。皇子嘉王楷廷對第一。詔升次名王昂爲首。雖親王亦然。惟我朝無此例。寧晉曹文忠公萬鍾。起諸生。中京闈第二名。署代州學訓導事。上章言年少寡學。未堪爲師。願就太學讀書。以需再試。或授別職。亦得自進。命授幕職。遂改秦和縣典史。許赴南宮。癸丑得雋。遂大魁天下。前代所未有也。後至少宰兼學士入閣。死於土木之難。官其子恩修撰。蔭入翰林者。金忠之子達。胡廣之子種。與恩纔三人。自餘在近侍。惟尙寶中書而已。其父子霑被。可謂奇異。

### 斷鬼石

太子太保兵部尚書臨漳石仲玉。璞初陳臬江西時。民娶婦三日矣。壻婦往拜其家。壻先歸。婦後失之。遍索不獲。婦翁訟壻殺女。壻不勝撈掠。自誣服。云棄屍前塘中。官使人求之。果得屍。獄成。獨璞疑曰。殺其人而棄屍。非深怨者不如是也。彼初昏。方燕好。胡乃爾爾。出囚問曰。爾辭信乎。囚叩頭曰。信。速死。公之賜也。屢問皆然。璞計無所出。乃齋沐夜焚香。祝曰。此獄關綱常。萬一其婦與人私。其夫既受汚名。又枉死於理安耶。天其以夢覺我。夜果夢人贈一麥字。璞思曰。兩人夾一人也。獄有歸矣。比明。械囚首。令待時行刑。囚未出。璞見一童子竊向門內闕。璞令人召入曰。爾羽客胡爲至此。得非爾師令爾偵某囚事乎。童子大驚。吐實。果二道士素與婦通。見匿之槁麥中。其事遂白。江西人號曰斷鬼石。璞爲人平易。類輕脫者。遇事剛明。凜不可犯。歷官四十餘年。清介如一日。致仕歸。買田僅百畝。鄉人有爲典史歸者。璞往其家。几上陳銀卣。前列金杯十餘。問曰。女宦幾年矣。曰。未考也。曰。胡歸乎。曰。刁民誣吾貪。奪職。璞曰。嗟乎。使吾治女。女焉能還鄉里哉。拂衣出。

歷事六科

近侍以翰林六科爲清要。觀洪武中文華武英之選。可知已。永樂中。徽州府學教授齊河趙文。嘗乞便養。建文時。左轉教諭鄱陽。旣復官。罹艱。及服闋。詣京。文廟甚念之。命歷事刑科。參駁一年。乃除岳州府學。已而詔吏部。選老成能講說者。以侍東宮。上曰。趙文可。卽召至御前。面諭授春坊左中允。賜謙。俾爲輔導。蓋以向歷事爲優異也。宣德癸丑冬。章皇命吏部。選在外庶官有文學者。六十八人。令內閣試諸廷。擇其優

者。知縣孔友諒。進士胡端禎。廖莊。宋璉。教諭黃純。徐惟超。訓導婁昇。七人。上令改進士爲庶吉士。與知縣教官。俱歷事六科。以備用。是時合三科進士。選庶吉士二十八人。與修撰馬愉。陳恂。林震。曹鼐。編修李文。龔琦。鍾復。趙恢。評事張益。同進學文淵閣。庶吉士分翰林六科兩等。爲此年爲然。

### 外任改京秩

祖宗時中外之臣。惟論品秩尊卑。未嘗重內而輕外。永樂庚寅。許州知州潘文奎。以事當降。近臣有薦其文學者。卽擢春坊左司直郎。乙未春。湖廣按察僉事王霖。啓言。蘄州同知桂宗儒。柔懦當黜。據老人顧豫等言也。宗儒亦啓稱。在任日淺。公差日多。乞容報効。期以歲月。果無成功。罷黜甘焉。時東宮監國。令仍同知名色。月支米一石。在都察院問刑。以三年爲期。己亥六月。以無過奏聞。上曰。同知任職。五閱月耳。何嘗廢事。而遽欲黜之。何不來奏。而啓東宮耶。僉事其令御史詰問。宗儒在吏部聽候。霖詰問畢。九月。擢宗儒爲翰林修撰。宣德丙午七月。吏部言四川按察使陳璉。持憲非所長。璉儒者。素有文學。永樂間。嘗獻歌頌。被寵任。上雅知之。召至京師。擢南京通政使。專掌國子監事。是三人者。皆由外官改京秩。而宗儒尤出異數。文奎官終參議。璉。吾廣東莞人也。後至禮部侍郎。

### 曹月川學行

永樂中以理學鳴者。河南澠池。有曹月川先生。正夫。端。戊子鄉薦。己丑乙榜。授霍州學正。壬寅。改蒲州。教人以踐履爲主。日事著述。有四書詳說。太極西銘通書釋文。考經述解。性理文集。儒家宗統譜。家規輯略。



存疑錄、夜行燭等編其事。父母養志愉色。飲食衣服。惟務精潔。及遭喪。五味不入口。寢苦枕塊。始終不易。既葬。廬墓六年。建祠堂以事先。又建義祠以薦外族之無後者。不用浮屠巫覡。詣縣上書。請毀淫祠。年荒勸賑。全活甚衆。屢舉同僚之喪。貧不能赴任者。贖之。客死者葬之。學徒從教。一於禮義。郡人皆熏炙而化。甲辰。蒲、霍二州弟子上章競留之。霍州先上得允。宣德甲寅卒於官。正統中。河南僉事姑蘇張敬澠池知縣胡復立特祠。

猗蘭操

宣廟御製四言招隱詩。復作七言招隱歌。以賜吏部尙書蹇義。又出擬猗蘭操。賜諸大臣。其辭曰。蘭生幽谷兮。曄曄其芳。賢人在野兮。其道則光。嗟蘭之茂。與衆草爲伍。於乎賢人兮。女其予輔。宣德壬子春。命京官三品以上。舉方面郡守。後又出詩歌以示意。內閣少傅楊士奇。楊榮。舉交趾南靈知州黎恬。建安教諭楊壽夫。臨清教諭彭琉。踰半載。餘無舉者。乃敕諭行在吏部切責之。八月。始以吏部員外魏驥。鴻臚寺丞周銓。吏部郎中楊應春等名上。卽擢驥。南京太常少卿。恬。春坊右諭德。壽夫。琉。行在翰林編修銓等爲參政。參議副使。凡十有九人。可謂銳情旁求者矣。其令後有贓罪。并罪舉者。按高皇帝時。大學士吳伯宗。坐弟仲實薦舉。不以實降檢討。是亦舊章也。洪武中。奏牘凡已仕而廢。由薦起者。謂之閒良官。未仕者。則有賢良方正孝弟力田聰明正直人材賢士懷材抱德通經孝廉等科。文皇帝令舉沉滯下僚。隱居田里二者。以美容儀善言語能文章爲賢。而略其過。永樂己丑。取用孟周等三人。以爲御史。令洗雪其在前罪犯。

嘗願問近臣。思得詩文之士。令其察舉。尙寶少卿袁忠徹。以海寧朱祚。應詔。卽命兵部驛召至京師。用爲行在中書舍人。祚以能賦。受知東宮。時皇太孫在側。心亦奇之。及卽位。擢置左右。數進其所爲詩。大見稱賞。考滿。超授翰林修撰。歷九載。進尙寶少卿。雖推舉才行。而文學尤見重者如此。繩祖武。明舊章。蓋非一日之故也。

### 謫官盡職

河南參政孫原貞。奏旌賢事。故汜水縣典史曾泉。始由進士。擢任御史。以事黜降。自宣德六年到任。操行廉謹。蒞事勤能。勸學興禮。督農事。稽女工。尤恤貧窘。無牛具者。勸與耕種。乏綿花者。借與紡織。時歷鄉村。察其勤惰。以示勸懲。又率民墾荒田。以收穀麥。伐材木。以易貨財。用以納逋稅。辦軍需。官有儲積。民無科擾。以其羨餘造船。以備僦運。置棺以助死喪。歷任三年。俗淳訟簡。家給人足。然其所以裕民者。不過用力。因地利。以阜其財。厚其生耳。聖明在上。郡邑率多俊人。然求其用心之勤。治事之能。見效之速。如泉者。不多得也。臣至其邑。泉沒已三年。民之懷惠。至今稱之。乞敕該部覈實。原其過名。追復其官。以爲天下士風之勸。泉字本清。吉安人。謫官盡職。可謂賢矣。近時貶秩者。張舊。檠戟。服舊采章。氣怏然。藐視民事。若不干涉。眞泉之罪人也哉。

### 賜降虜姓名

永樂中。迤北虜酋率衆降附者。悉賜姓名。拜官都督。至百戶有差。旣奠居。則給與牛羊孳牧。前後凡數十

人其最可稱者。吳允誠。金忠。允誠本韃靼平章把都帖木兒。嘗率騎士往征。亦集乃。多所俘獲。戰必盡力。部將脅其妻子。亦不肯叛。仍擒叛者以獻。累功封恭順伯。忠本元大將也。先土干。永樂癸卯來歸。封忠勇王。宣德戊申。扈從巡邊。遇兀良哈萬衆入寇。奮前斬馘。累加太保。此二人效用。雖漢之金日磾。唐之契苾何力。亦無以過。孰謂夷狄不可以推誠器使哉。

恩宥軍伍

國初。民出塗炭。樂於從軍。後因征調。率多逃絕。謫配者尤甚。惟塚集最爲良法。戶三丁以上。塚正軍一名。別有貼戶。正軍病死。貼戶丁補役。永樂初。貼戶止一丁者免之。當軍之家。仍免一丁差役。其最嚴者。惟齊黃奸惡九族外親姻連。亦皆編伍。有徧一縣連蔓盡。而及他邦者。人最苦之。故刑部北京浙江廣東三清吏司事繁。增設主事。乙未五月。文廟御奉天門。召吏兵二部至前。色甚怒。謂曰。洪武年閒。囚多官少。事無不辦。今則囚少官多。冗食甚矣。刑部官屬可裁。剩員補他官。如無缺。可配隆慶保安諸衛爲軍。吏部以缺多啓東宮。兼補行在諸部事。乃已向非仁廟委曲善處。則冗員亦編伍矣。宣德丙午九月。故待詔魯孫。嘗侍上講讀。坐罪謫盧龍。有司追其子輿。補伍。上聞。卽削其戍籍。而官輿爲鴻臚序班。己酉四月。楚雄衛軍李志道。死而無繼。有司追補其孫宗侃。已於原籍浙江中式。兵部尙書張本。請依洪武中石堅事例。開其軍伍。俾讀書會試。以自效。上卽從之。安南黎利既得國。兩命右通政徐琦副禮部侍郎章敞奉使有功。將賞之。琦言家寧夏軍伍。詔除其戍。此三事。皆宣廟之仁也。柄用之臣。充廣德意。除黨戍之籍。復塚集之規。

通變宜民未爲不可

陳御史斷獄

武昌陳御史孟機。智按閩。有張生者。殺人當死。其色有冤。詢之。生曰。鄰居王姬。許女我。已納聘矣。父母歿。我貧無資。彼遂背盟。女執不從。陰遣婢期我某所。歸我金幣。俾成禮。謀諸同舍楊生。楊生力止我。不果赴。是夕女與婢皆被殺。姬執我送官。不勝拷掠。故誣服。卽遣人執楊生。至。色變股栗。遂伏罪。張生獲釋。人以爲神智。有聲宣正閒。至右都御史。

**Page not available.**

Please help scan and add.

页面不可用。

请协助扫描添加。

# 雙槐歲鈔卷第五

## 閱武將臺

將臺在朝陽門近郊。宣德中閱武於此。乙卯春。英宗初御極。方議開經筵。而中官王振輩。乃導上右武。於是詔在廷文武大臣偕振閱武將臺。試騎射而殿最之。振奏以隆慶右衛指揮僉事紀廣第一。遂陞都指揮僉事。廣藝既尋常。性復庸懦。常以衛卒之守居庸者。往役闕門。大見親昵。輿論鄙之。正統丙辰十月望日。車駕駐蹕將臺。命諸將騎射。以三矢爲率。受命者萬餘。惟駙馬都尉井源。彎弓躍馬。三發三中。萬人喝采。聲徹天地。觀者羨其容貌瓌壯。藝又精絕。相謂曰。此福將也。上亦大喜。惟徹上尊賜之。觀者又相謂曰。往年太監閱武。紀廣驟陞三級。今日萬乘閱武。豈但一杯酒耶。然竟無殊錫。戊辰秋。虜酋也先拘我信使。侵我邊圉。命源與恭順侯吳瑾等五人各將一軍。充總兵官爲前鋒。逆戰塞外。己巳。上親征。廣扈從。至大同。賂左右得還。八月。召至沙嶺。陞都督僉事。仍守萬全。源自大同趨懷來。迎護聖駕。與弟潤從。至土木。力戰俱死。旣蒙塵。廣乃帥師離沙嶺北行。獲虜猛秃兒。以功上。十一月。景帝卽位。陞廣都督同知。應錄陣亡子孫。源無子。官其弟溟錦衣鎮撫。家道日落。所居宅歸尙書陳汝言。英宗復辟。盡以源莊田賜內侍。廣乃累官鎮朔將軍左都督。卒。追封溧陽伯。諡僖順。子孫世襲。其禍福懸絕如此。世固有幸不幸耶。

## 內府教授

國初設大本堂於內府。東宮親王讀書其中。學士宋濂祭酒梁貞魏觀等迭爲講授。而選國子生爲伴讀。則布衣高啓謝徵分教之。尋命功臣子弟常茂康鐸等入伴。於是諸生出就六館。而啓徵亦各授官。永樂中令聽選學官入教小內侍。正統初太監王振開設書堂。擇翰林檢討錢溥吏部主事宋瑛輩輪日入直。名爲內府教書。實則與國初異矣。宣德初九真判官劉翀服闋來朝。以舊學之臣。改主事。尋改行在修撰。會大學士陳山離閒趙邸上疎薄之。命解內閣幾務。與翀同教內侍之秀慧者。開席於文華殿東廡。後益以主事王一寧給事中朱應康振。時有司以神童瑞安任道遜薦於朝。年纔十二。上面試其書。嘉歎。俾卽文華殿續學。未幾出爲國子乙卯春三月。英廟改一寧爲行在修撰。應振俱檢討。未幾應卒。翀與振皆擢僉事去。獨一寧累遷少宗伯兼學士入閣。蓋受業者之力也。景泰時選小內侍黃賜覃昌等七人。俾中允倪謙呂原教之。亦於文華殿東廡。天順後罷之。惟於內府書堂。專命翰林官往教。遂爲定例。

蒙古瓦剌

元順帝北遷。以洪武三年殂。國人諡曰惠宗。太子愛猷識里達臘立。十一年殂。諡曰昭宗。次子益王脫古思帖木兒立。九年大將軍永昌侯藍玉帥師大敗之於捕魚兒海。益王走至也速迭兒之地。遇害。五傳坤帖木兒皆脩立。修弒其強臣猛哥帖木兒。據瓦剌。永樂初鬼力赤立。非元裔也。部下叛之。其太師阿魯台統有部落。六年迎立蒙古之族本雅失里。而鬼力赤爲其下所戕。瓦剌三酋不附阿魯台。日相讐殺。乃來朝貢。詔封馬哈木爲順寧王。太平賢義王。把秃孛羅。安樂王。七年遣給事中郭驥使本雅失里。被殺。瓦剌

襲敗阿魯台。本雅失里走臚胸河。是年七月。命征虜大將軍淇國公邱福討之。全軍覆沒。八年。車駕親征。本雅失里遂去。阿魯台遣使貢馬。十年。瓦剌馬哈木滅本雅失里。而立答里巴爲主。阿魯台請討。十一年。封阿魯台爲和寧王。自是瓦剌朝貢不至。十二年。上親征瓦剌。敗之。馬哈木遠遯。遂班師。十三年。瓦剌遣使貢馬謝罪。十五年。馬哈木死。子脫歡襲封順寧王。阿魯台遂叛入寇。興和二十年。上親征。次殺胡原。阿魯台北走。遂班師。二十二年。上復親征阿魯台。次清水源。不見虜而還。晏駕於榆木川。宣德九年。瓦剌脫歡攻殺阿魯台。欲領部落。人心不服。乃立元後脫脫不花爲主。居沙漠之北。哈喇噴等部皆應之。正統八年。脫歡死。子也先益強盛。屢犯邊。十四年。上親征。車駕被遮。景泰元年也先奉太上皇帝還京。自是入貢不絕。四年。殺脫脫不花。遣使致書。自稱大元田盛大可汗。啓詔稱爲瓦剌王。蓋蒙古諸部悉爲所併矣。雖慕義來朝。人輒千餘。馬至萬數。覘我虛實。坐弊中國。包藏禍心。未可知也。矧其俗孳牧駝馬牛羊。飲酪食肉。衣其毛革。造弓矢刀鋌。以爲兵器。馳騁射獵。勇於戰鬥。每入寇。則一人所乘。三馬迭換。以革囊盛乾酪爲糧。不將輜重。故其人馬不罷。銳氣無損。來如風雨。卒莫能拒。去如絕絃。速不可追。惟攻城步戰。非其所長。然則備邊之策奈何。足食足兵。且屯且守。俟其部衆志驕心離。以計破之而已。

### 朶顏三衛

兀良哈。古山戎也。後爲契丹及奚。洪武初。其衆數爲蒙古抄掠。不能安處。乃相率歸附。誓守臣節。太祖設三衛官以統之。自寧前抵喜峯。近宣府。曰朶顏。自錦義歷廣寧。至遼河。曰秦寧。自黃泥窪。逾瀋陽鐵嶺。至



開原曰福餘。皆逐水草無恆。部落以千計。而朶顏最強。其貢路入自喜峯口。而馬市則在遼東。防其變也。後竟叛去。仍附蒙古。先是卽古會州地。設大寧都司營州等衛。以爲外邊。復修山海關。至古北口。以爲內邊。太宗靖難初。兀良哈騎兵先韃靼來助。遂棄大寧故地與之。以內邊爲界。永樂改元。仍舊制。設三衛。有官至都督者。尋復陰附阿魯台。掠我邊戍。二十年。上親征阿魯台還。大敗其衆於屈烈河。宣德三年。車駕出獵巡邊。駐蹕遵化。適其衆萬餘入寇。出喜峯口。遣精銳三千大敗之。俘斬無算。正統九年。竄伏迤北。時出擾邊。上命發偏師二十萬。分爲四軍。成國公朱勇。出喜峯口。由中路。左都督馬諒。出界嶺口。由北路。興安伯徐亨。出劉家口。由南路。左都督陳懷。出古北口。由西北路。蹠灤江。渡柳河。經大小興州。過神樹。至全寧。遇福餘。逆戰。走之。次虎頭山。遇秦寧朶顏。又擊敗之。御史姚鵬。上其功。詔加勇太保。亨進封侯。諒招遠伯。懷平鄉伯。蓋外邊之地。西自密雲之墓田嶺。東至山海關。乃其所住牧。正統末。附瓦剌。爲也先鄉導。後亦朝貢不絕。其俗喜偷善掠。嘗入北漠盜馬。三四人。驅千百匹。邊人唱以酒若貨。執而殺之。故報復抄虜無寧時。一遭到衄。數十年不敢入。性本貪黠。叛服無常。若誠信撫之。可不勞兵而戢也。然遼東宣府大同。聲援本相聯屬。自大寧爲彼所得。遂爾隔涉。可無慮哉。

倭國逸書百篇

日本卽倭也。洪武辛亥。國王良懷遣僧祖來入貢。祖訓云。雖朝實詐。暗通奸臣。胡惟庸謀爲不軌。故絕之。乃於遼浙閩廣沿海。置備倭官軍。永樂初。國王源道義入貢不絕。後犯遼東之金州。廣寧伯劉榮大敗之。

雖朝實詐可徵矣。宣德中。以久不通貢。求可往使者。或言主事浦城潘賜。嘗爲行人。兩使日本。復除鴻臚少卿。充正使。求可副者。禮部尙書胡濙會薦國子學正金壇高遷。遂改行人。俱賜一品服以往。旣至其國。卽遣陪臣隨之入貢。宣宗甚加獎勞。乙卯五月。以舉賢擢遷翰林編修。按溫公日本刀歌有云。徐福行時書未焚。逸書百篇今尙存。夫旣絕之矣。信使往來。俾進逸書。使五經由是而完。帝王大典。得以不泯。顧不遑與。

### 朝覲旌勵

正統乙丑正月。刑科給事中鮑輝言。天下各官來朝。乞敕吏禮二部詢訪。有廉能豈弟治行超羣者。禮部官引赴御前。親加獎諭勸賞。吏部具錄姓名。待其考滿。舉薦擢用上。是其言不許徇私。於是會議推舉司府州縣官丁鋌等。廉能治行。旤衆爲優。賜以敕諭。各賞衣一襲。鈔百錠。賜宴於禮部。復任後。吏部遇缺擢用。此盛典也。按洪武中。河閒知府楊冀安等來朝。命吏部第爲三等。稱職無過者爲上。賜坐宴。有過稱職者爲中。宴而不坐。有過不稱職爲下。不與宴。序立於門。宴者出。然後退。永樂中。考察以貪去者。皆謫戍。旌勵之道備矣。睿皇酌而行之。其務爲寬厚者與。

### 石主事掾師

石大用者。蘇州豐潤人。正統癸亥。貢入太學。明年。李祭酒時勉忤權璫王振。枷號於監前。大用會六館。疏請代罪。諸生始則從。中則疑。終則無一人與偕者。乃獨具疏曰。臣聞民生於三。事之如一。今李時勉擅伐

官樹薄示枷號。切緣時勉年已七十兼患風疾。況值炎熱。死亡無日。乞容臣代枷。以存師生恩義。疏上。並釋之。是秋大用中京闈鄉試。時勉感其誼。令舉人五日一升監。自大用始。後大用就銓。得戶部主事。蓋氣誼素爲人所重故也。

胥掾官至尙書

蒙古用人。重吏輕儒。七品文資。選爲省掾。八品流官。選爲令史。公卿多由此進。舞文弄法。殃民甚矣。聖祖革其亂政。惟崇儒術。然猶得銓京職。洪武中。吏部主事談士奇輩。不可枚舉。自儒入吏者。戊辰十一月。宗人府吏三名。以辦事下第。舉人王章尹啓敬等爲之。蓋是時掌府事者。爲秦晉燕王。故重其事也。丙子正月。吏部具缺奏聞。選舉人監生周原張勤李暹引奏。王命還監卒業。惟選無過吏爲之。自此科目之事。無復少濶矣。凡吏途發軔。多至三品。無位八座者。惟靖難初。北平布政司吏清苑李友直。告以密謀。累擢至工部尙書。非年資也。永樂己丑正月。上御奉天門。戶科都給事中海李晟奏事。上謂吏部曰。吏員中多有才幹者。然亦能害人。可令給事中保舉。若非其人。則平日交結可知。其併罪之。晟受命而出。乃奏保郎中萬子雅。辦事官前御史傅衡。詔試二人以事。然後任職。其慎重如此。已而御史洪秉龍士安等四人入見。上曰。御史朝廷耳目之寄。須用有學術。達治體者。安用吏爲。遂黜秉等爲序班。此後銓京職者。部屬一途耳。宣德中。松江守進賢黃子威。蘇州守靖安況鍾。前後以郎作郡。各擅政譽。人謂南昌多賢胥。正統中。江陰徐孟晞。以郎中試兵部侍郎。鎮甘涼。累遷至兵部尙書。爲人謙慎有容。在縣時。三考皆兵房。有戊

絕勾丁而誤及者。其人祈脫。貧無可饋。具酒食。令妻勸觴。而出避之。妻有麗色。晞絕裾而走。徹夜具文移。成明日向其人曰。女何至此。卒爲脫免。他事類此。在郎署時。同官一主事。每向胥曹輒罵。意在晞。晞不爲意。後主事沒。晞爲舉殮。送之歸。及爲殿試讀卷官。刻錄。惟書江陰人而已。其功名。出蘇松二守上。胥掾中一奇士也。

### 士夫孝行

前史列傳孝行。皆出編氓。士夫與者蓋尠。我朝以孝治天下。薦紳多被旌者。姑記數人。鞏縣魏敏。洪武中進士。吏科給事中。母病。予告歸省。未至而訃。卽往墓所哀慟。水漿不入口者五日。廬墓三年。朝夕哭奠如初喪。東阿師達。少孤。事母孝。年十三。母疾危。思食藤花菜。地不常有。達亟出求。至城南二十五里得之。及歸。夜已二鼓。道遇虎。達驚而呼天。虎舍之去。持菜還。母食之愈。後入太學。擢御史。陞陝西按察使。丁母憂。去官。廬墓側。不茹葷飲酒三年。永樂中。召爲兵部侍郎。終南京戶部尙書。掌吏部事。益都王讓。有孝行。嘗廬墓。致湧泉之應。洪武末。由鄉薦授國子學錄。永樂中。簡侍皇太孫。累官吏部侍郎。眞定畢鸞。父文顯。莒州學正。卒於官。藁殯於莒。時猶幼也。比長言及。輒嗚咽涕淚。養母不離左右。比母喪。衰絰徒步走莒。負父骨歸。而合葬焉。廬於墓側。朝夕哀臨。野鹿助其悲鳴。有兔引子游其廬。若素篆者。巨蛇蟠於門右。恆衛守之。正統壬戌。登進士。爲御史。光州庠生劉進。貢入太學。景泰癸酉。中順天鄉試。除太平通判。連遭父母喪。結廬墓側。負土成墳。手植柏數百株。烏鵲鷓鴣。日夕馴集。陞太僕丞。獲追贈焉。子廷瓚。廷瓚。皆登科第。而

廷瓚官御史。東平舉人張琛。正統間爲衢州同知。喪父。廬墓側。泣血三年。不視家室。服闋。陞吏部郎中。桂林劉本。第進士。授刑部主事。宅憂廬墓。芝草生焉。旱麓小泮坎中。忽出白蓮花。人以爲孝感之瑞。渾源王誠。以貢丞慶都。罹憂于廬墓。無日不哀慟。終喪乃已。此八人皆詔旌其門者。近世士夫以孝爲迂。遭喪則覬奪情以爲榮。其賢不肖何如也。按奪情起復。始自永樂初。右副都御史劉觀。刑部右侍郎李慶。工部右侍郎趙毅。其後相沿成風。至於今日。吁。可悲也已。

場屋知人

場屋定制。始自洪武甲子。儒吏雜職人員許應鄉試。文字許減場。所出四書題。或論語二道。中庸一道。而無孟子。亦有中庸二道者。皆不拘也。人各一經。兼經者聽。洪武甲戌會試。第三人景清。刻詩書經義是已。詔誥表內科一道。兼作者聽。永樂辛卯福建第一人林誌。刻誥及表是已。主考惟兩京用翰林。各布政司。惟用教官。或郡縣京官之居鄉者。亦有貢士儒士主考職官分考者。翰林居鄉。如侍講余學夔。侍讀尹鳳岐。皆嘗爲吾廣主考。宣德己酉。編修董璘在浙江。王統丁卯。修撰許彬在福建。則見任奉旨者也。其所取士。五名內或經魁不備。如洪武辛未。第一人許觀。第五人胡泰。皆書是已。所刻文。或中庸孟子皆二篇。如正統辛酉。廣東鄉試是已。或有論策重複者。不能悉數也。桐鄉楊長史宗道。述掌教監利時。正統甲子。同考蜀闈。簡一減場卷爲舉首。衆從之。乃周文安公。洪謨也。丁卯復往闈。闈得陳康懿公。俊爲舉首。皆至尙書。爲時名臣。近時所命之題。所刻之文。皆有一定規矩。所取必須全場。減則貼出。然知人如述者鮮矣。壬

戊會試商文毅公輅下第。本房周學士綬以爲恨。吾廣邱文莊公潛黜於辛未。岳編修正見其卷。大惜之。皆作序文。期以入閣。後皆如其言。若周岳二公。其亦巨眼者乎。

### 京軍邊軍

京軍三大營。皆取近畿之卒。更番上操。國初止有五軍營。中軍左右掖及左右哨是也。永樂初。因龍旗下三千胡騎。立三千營。後征交趾。得神鎗火箭之法。立神機營。牧馬草場。總在霸薊二州及永清縣。若定興安肅二縣之閭臺。則五軍營專之。薊之安和鄉。則三千營專之。香河之孟家庄等地。則神機營專之。居常則五軍以肄營陣。三千以肄巡哨。神機以肄鎗手上親征。則大營居中。營外分駐五軍。步卒居內。騎卒居外。其外爲神機營。又其外有長圍。各周二十里。令軍中收放樵採。皆不出圍外。正統末。議者以三營各自團操。武藝不能相通。於是少保兼兵部尙書于肅愨。謙簡精銳馬步一十五萬。分爲十營。每營各以都督總領。每五千用都指揮一員。每千又用都指揮或指揮一十五員把總。每五百各用指揮三十員分管。每隊用管隊官二員。常令在營操練。統體相維。兵將相識。出征則令原管都督等官領焉。後馬恭襄昂改立團營十二。曰奮武。曰耀武。曰練武。曰顯武。曰勇敢。曰果勇。曰效勇。曰鼓勇。曰立威。曰伸威。曰揚威。曰振威。簡選三大營。餘者名曰老家兒。專備營造差用。乃益以在京在外精兵二十五萬實之。分爲春秋二班。團操聽征。此京軍之大略也。邊軍有三等。在本鎮爲本兵。調自他鎮爲客兵。邊民應募及原點民壯爲土兵。近日本兵多被扣減糧賞。占田私役。採打松榛。斫伐薪木。客兵則一例屯種採辦巡哨扛拽。月餉則本客

混支。舊例折色者六月。本色亦如之。今自折銀七錢。減至二錢五分爲則。本色糧每一石止與四斗。至於器械欠缺。馬匹羸弱。皆不恤也。士兵優恤之法。每名量免戶租六石。常存二丁幫貼。五石以下者存三丁。三石以下者存四丁。差役自二十石以下盡蠲之。其後就募者。山東河南之礦徒而已。此邊軍之大略也。邊軍不足。則調京軍。人各銀一兩布二疋。炒二升。然猶沿途搶掠。且安佚日久。少經戎陣。腥羶一逼。人馬辟易。挫衄則首先逃避。以搖人心。小勝則強奪他功。以爲己利。况邊粟有限。饋餉不繼。足生他變。可無慮乎。近則潛役私門。雇倩代操。益不可用矣。愚切以爲京軍止衛京師。邊軍各守本鎮。惟土兵用聚集之法。正貼二戶。如古羨卒。使不乏絕。關外閒田及沒官亡礙者。人給二十畝。使自耕之。尤必廣開鹽額。而輕其子本。或招商上納。而倍息以償。俱令輸納本色。邊儲可旬月足也。在京則冬衣布花。在邊則胖襖鞵袴。必豫期給焉。養軍大計。似不出此。然事勢亦已難矣。

馬政

國朝馬政。掌於太僕。兩京畿及山東河南。牧之於民。量免糧差。然陪補受累。山西陝西遼東。各設苑馬寺。養以恩。隊軍千餘人。然有名無實。政日秕矣。其與夷市易者。洪武初。於陝西洮州河州西寧。各設茶馬司。制金牌四十一。上曰皇帝聖旨。左曰合當差發。右曰不信者斬。上號藏內府。下號降各番族。三年一差官。齎往對驗。以茶易馬。上馬八十斤。中馬六十斤。下馬四十斤。私茶出境。犯人與把關頭目。俱凌遲處死。家遷化外。貨物入官。駙馬都尉歐陽倫。坐販私茶賜死。其爲厲禁可知也。永樂中。遣御史三員。巡督茶馬。然

增給茶數至百斤。而禁亦少弛。正統十四年。停止金牌。惟令番族以馬來易而已。西番之族。以茶爲命。一背中國。不得茶。則病且死。故設法王國師以統領之。官民相承。以馬爲科差。我以茶爲酬價。故哈立麻輩見禮於文皇帝時。非利其術也。制西番以控北虜之良算也。乃若回回市馬價直。上馬絹四疋。布六疋。中馬絹三疋。布五疋。下馬絹二疋。布四疋。駒絹一疋。布三疋。陝西慶陽靈州臨洮鞏昌延安鹽課。召商開中。上馬一匹。鹽一百引。中馬八十引。下馬不與。此亦可行。然不如茶馬千係之大。萬世不能易也。惟是牧之於民者。宜做監苑之法。擇水草之地。立廐庠之所。順游息之性。定爲牧式。教以降虜。尤必寬其追陪。以俟蕃息。民其或少紓乎。

### 周鳳錢曄

江陰周鳳。聰敏多伎倆。人家婦女見之。風行鬼術。皆淫惑。更無投梭之拒。事發。官司捕之。歲久稍懈。乃暮夜潛歸。室人爲設酒食盡。懼。鳳欲就宿。輒辭曰不可。鳳詢其故。對曰。君在外之日久矣。一宿後。倘有身。何以自明。且人倘聞妾生子。將蹤跡之。君之累不小。世謂其智而有禮。鳳字岐鳳。能詩文。姑蘇錢曄嘗寄之詩曰。琴劍飄零西復東。舊遊清興幾時同。一身作客如張儉。四海何人是孔融。野寺鶯花春對酒。河橋風雨夜推篷。機心盡逐東流水。惟有家山在夢中。曄亦豪黠。以貲爲都司經歷。鄉人訟其不法。知府楊貢執而罪之。曄多所囑托。反訐奏貢罪。錦衣官校奉命與巡撫崔都憲恭同訊。有旨以同寮不和。俱黜爲民。曄本一富民。第以貲得冠帶。與貢並無寮友之義。命下之日。人無不驚謬。



戊辰登科錄

正統戊辰科進士首甲三人。時稱儒道釋。狀元彭時。安福儒籍。榜眼陳鑑。家本姑蘇。謫戍蓋州衛。依神樂觀道士。年三十四矣。然猶未娶。出家故也。探花則會元岳正。通州灤縣人。父府軍衛指揮興。蚤世。生母劉。或曰陳。莫知其姓。幼避嫡妬。居大興隆寺。故人以釋目之。齒最少者。香河李泰。父永昌。見任太監。尤爲異事。古稱謁者監。曷嘗有兒。然則泰非邪。舊制讀卷官。例用內閣九卿及翰林堂上官。是科預者。有掌光祿寺事。戶部左侍郎李亨。太常寺少卿兼翰林院侍書程南雲。太常寺少卿黃養正。事體之變如此。

賈斌進忠義集

宣正時。貂璫熏灼。迄王振貽禍。土木無敢訟其非者。景帝改元。山西行都司天城衛令史賈斌。疏言。漢桓帝不任賢臣。權歸宦官。唐文宗忽於良佐。受制家奴。宋之徽欽。從虜北行。亦閹寺用事之所致也。太上皇帝失位去國。皆由倚托匪人。然羣臣無一捐生以赴難者。事君能致其身。豈空言歟。皇上肇登寶位。宜法高皇帝以爲治。事無大小。悉經宸斷。除去竊柄。閹人專備灑掃。凡阿諛者必斥之。端本澄源。謹終如始。則天下一新矣。臣於歷代直諫盡忠守節之士。與恃寵宦官。撮其尤者。錄成四卷。名之曰忠義集。伏乞刊布。臣僚必能觀感以興起其忠義之誠。而宦者亦不得縱其奸宄之私矣。時胡忠安漢在禮部。覆奏謂斌言雖有理。然章皇帝御製臣鑑。已行頒給。足爲勸戒。所編不必刊布。且斌擅自離役。欲送法司問罪。誠恐阻塞言路。合發回原衛。仍行天下。在官之人建言。不許擅離職役。違者罪之。若奏機密重事。不拘此例。制曰。

可斌。山東商河人。莫考所終。

### 蠱吐活魚

正統間。吳江周禮。行貨廣西。思恩有陳氏女。寡返在室。贅爲壻。凡二十年。有子已十六歲矣。禮忽思歸。妻不能止。實蠱食中。禮不知也。因令其子隨之。默囑曰。若父肯還。則與醫治。因授以解蠱之法。禮至家。蠱發。腹脹。飲水無度。其子因請還期。禮曰。吾亦思汝母。奈病何。稍瘥。卽行矣。曰。兒能治之。卽返。接禮於柱上。禮告渴。以瓦盆盛水。近口傍。欲飲。則掣去之。如是者。亡慮數百次。煩劇不可當。遂吐出一鮑魚。撥刺尙活。腹遂消。蓋蠱中多有年限月之蠱。稍踰期。則毒發不可救。故寡婦號爲鬼妻。人不敢近。旅客娶之。多受害焉。

### 冤魂入夢

吾廣陳參議贊記一事云。戴謙爲南京御史。夢騎馬至清江廠。有朱衣引一人索命。蓬首褐衫。姓李。朱衣者曰。盍往觀乎。卽前導。所過皆竹房。至一家。獨瓦屋。入門。有男子臥地上。一婦人綠衣紅裳。簪花。處其旁。曰。欲救之。奈氣絕矣。驚寤。出水西門。至清江廠。物色得之。道途屋宇及死者姓氏。皆如夢中所見。呼其家問之。乃因市肉與屠人鬪而死。告以所夢。舉家皆大哭。婦人乃其姊。歸寧而暴死者。卽捕屠人寘之法。一時白下盛傳之。時正統八年四月也。

### 己巳禦虜諸將

正統己巳冬也。先以其主脫脫不花及諸酋鐵頭等。自紫荆關入寇。我師敗走。遂逼京師。時武清伯石亨。協守萬全。坐不揀乘輿。械繫詔獄。赦出之。使總京營兵馬。退虜贖罪。兵部尙書于謙。總督軍務。營於城北。亨帥師出安定門。挺刀先馳。從子彪持巨斧。與諸子弟從之。突入虜陣。所向披靡。轉戰西南。虜潰去。追至關。斬首萬餘。虜相蹈藉死。管神機營都督范廣。禦之於德勝門外。飛鎗火箭。殺傷數百。追至涿州。俘馘無算。虜主遂不敢入關。與也先皆夜遁。遣使講和。都督楊洪。孫鏜及廣。帥師破餘虜於固安。逐至關。盡殲之。洪子俊。手斬數人而還。論功加謙少保。亨進封侯。洪昌平侯。尋命俊充參將。守宣府。宦官喜寧。本胡種。導也先入寇。俊誘而執之。送京師。伏誅。以功陞俊右都督。虜方窺懷來。俊調永寧兵往守。奉御黃整奏聞。謙惡其擅調也。請誅俊。上不問。洪懼禍。奏取俊還京。隨營操練。從之。既至。謙併劾其守獨石。馬營賊破其城。喪師辱國。謂非誅俊不可。上命逮繫議罪。俊辯曰。逐虜之時。顧前失後。官軍聽調。關外之常。乃罪俊邪。詔斬於市。臨刑。有縞而至者。所狎妓高三兒也。慟而呼曰。天乎。忠良死矣。奚以功爲。紉其元。合於頸。使其家收殮。卽自經。觀者泣下。時景泰元年五月也。虜自求和。不復近邊。至是。聲言奉上皇來大同。坐中。鐵頭太師坐右。脫脫太師坐左。其意蓋卑辱我也。於是石亨楊洪帥師巡邊。挑修溝塹。布列營陣。築立墩臺。撥哨隄備。饋運不絕。仍設法招募在京軍官子弟。素閑弓馬者。人賞銀十兩。月糧五斗。得萬餘人。虜見有備。遂奉駕還。亨等之功也。初。張軛自貴州征苗。召還。謙劾其失機負罪。不可用上。宥之。自是軛與亨比。恨謙最深。景泰末。亨軛與宦官曹吉祥等。奪門復辟。乃首殺謙。以謙信任范廣。誣其同逆。併殺之。廣旣死。軛一日。

遇諸途。爲拱揖狀。左右問之。曰。范廣過耳。歸家發病死。亨得志專恣。官軍守諸關者。悉放歸以市恩。內閣徐有貞。李賢。許彬。薛瑄。以爲言。上重違亨意。別選兵以戍之。由是亨惡有貞等。皆被讒。斥爲民。薦其私人參議盧彬。太常少卿王謙。入閣。上不聽。尋得罪。下獄死。彪亦棄市。一時禦虜名將。亨洪與廣爲最。孫鏗。郭登。衛穎。柳溥。次之。張軌。紀廣。輩。齷瑣不足算矣。亨。渭南人。與彪皆方面鉅軀。鬚垂至膝。望之竦然。洪。漢中人。起自行伍。最善規營。虜畏之。呼爲楊王。俊死後。含痛而歿。追封穎國公。諡武襄。猶追其祿米。家產蕩盡。廣。丹徒人。世官遼東寧遠衛。論者曰。律有八議。功其最也。宋人所謂手滑。其楊俊之誅乎。于少保之功。白矣。而范廣猶鬱九原。石亨雖自掇禍。然罰不及嗣。彪宜末減。向使洪父子無智名勇功。則家至今存也。悲夫。

### 因災却瑞

正統己巳六月丙辰。夜二鼓。南京雷電震。烈風雨驟作。謹身殿火起。延及奉天華蓋二殿。奉天諸門。亦皆燬盡。御史呂昌劾奏。守備豐城侯李賢。及府部諸司。皆當逮治。上宥之。是年有土木之變。郕王監國卽位。詔凡有災異。有司卽時奏聞。言祥瑞進。詔諛者罪之。景泰辛未正月戊午。南京太常寺山川壇署奉祠羅輔。呈言。道童顧學誠。於壇井汲水。聞酒氣芳馨。見水色黃白。守備太監袁誠曰。此醴泉也。會兵部尙書靖遠伯王驥。及府部諸司。詣井取酒。薦奉先殿。然後具奏。禮部以聞。景皇以罷答之。不爲僞瑞所惑。固盛德事也。

雨滴謠

正統末京師旱童謠曰雨滴雨滴城隍土地雨若再來謝了土地滴音弟謂與弟也城隍土地謂郾王有此土也雨若再來謝了土地謝卸同謂上皇再來卸却此土還之也景泰驗矣復辟又驗

太學生進諫

景泰初大開言路太學生西安姚顯疏言王振竭生民膏血修大興隆寺極爲壯麗車駕不時臨幸夫佛本夷狄之人信佛而得夷狄之禍若梁武帝足鑒前車請自今凡內臣修蓋寺院悉行拆毀用備倉廩勿復興作萬世之法也時方建隆福寺不爲停止會寺成上方議臨幸有司夙駕除道太學生濟寧楊浩疏言陛下卽位之初首幸太學海內之士聞風快覩今又棄儒術而重佛教豈有聖明之主事夷狄之鬼而可垂範後世者耶會儀制郎中章綸亦以爲言上卽日罷行先是虜賊自弑其主脫脫不花而擁其衆浩疏請乘虜使未還出其不意調遼東陝西兵討之二疏旣上名震京師筮仕河東運司判官英廟復辟用薦擢知順德府陸辭日召至文華殿親賜戒諭及寶鑑以行累遷右副都御史巡撫延綏而顯不究於用云自正統至天順京城內外建寺賜額者二百餘區諫官不言故二生取重於世焉

易儲詔

景泰辛未八月思明府土官知府黃罔被弑庶兄都指揮使珖陰主之也巡撫廣西李侍郎彙副總兵武都督毅發珖情罪眞獄當死巡撫廣東揭侍郎稽乃奏言珖守潯州軍民畏服賊不犯境近聞爲事以致

賊徒流劫德慶。曲加寬宥。仍前哨守。則廣西寧而廣東無流劫之害矣。識者笑之。時上皇長子在東宮。瑛遣人赴京。先賂用事者。乃奏請易儲。命禮部會多官議。內閣陳循等將覆奏署名。少傅王文端公直有難色。循持筆作半跪。直不得已。亦署。給事中李侃對衆灑泣。都給事中林聰出語人曰。吾慟不署名。其實不然也。奏上。憲宗出就沂邸。而立見濟爲太子。生母杭氏爲后。而汪后廢。於是陞賞太濫。有滿朝皆太保。一部兩尚書之謠。直得所賜元寶。扣案頓足歎曰。此何等大事。乃出一蠻夷耶。吾儕愧死矣。累疏求退。然侃遷詹事府丞。聰右春坊司直郎。皆不辭也。珖以大赦原免復職。于少保以廣西賊起。請賞珖以作其氣。上從之。已而陞都督。充參將。毅以事降黜。棠因此致仕。其後見濟殤。御史鍾同。郎中章綸。疏請復儲。皆下獄。刑科給事中徐正。密請召見便殿。屏左右。言宜置沂王於所封沂州。出上皇與俱。以絕人望。景王怒。出正爲雲南衛經歷。正復眷所淫者。未行。乃謫戍鐵嶺衛。及上皇復辟。時珖已死。發棺鞭屍。以示鑒戒。逮正至。正驚破膽。便溺皆青。遂磔於市。初太子太保兼吏部尚書何文淵。因言官劾其貪縱。自言易儲有功。詔書所云。父有天下。傳之子。天佑下民。作之君。已所屬對也。得釋罪致仕。至是懼禍。自經死。時揭稽已降。知府致仕家居。文淵弟子也。與其子主事喬新等爭訟。詣奏文淵之死。實諸子逼以脫禍。喬新亦令人告稽。巡撫廣東時。代黃珖爲易儲之疏。俱命官校逮至京。鞠之。迹涉已往。俱獲釋焉。

### 京闈二科舉首

南北京闈。例令四方髦士。遊太學。寄京籍。及依親仕宦者。皆得應試。景泰癸酉。吉安羅崇嶽。冒試中順天。

府第一爲京士許奏。詔充原籍學生。丙子復領江西三十九名解。是科順天舉首。又江陰徐泰也。內閣陳循子瑛。王文子倫。不與選。循等論奏。考試官少卿兼侍讀劉儼。侍講學士呂原。閱卷不公。如監試御史林鶚。同邑林挺。亦在中列。且策及正統。摘其語以激上。峻文巧詆。必欲置儼於死。有旨令翰林科道覆考。少保高穀。力疾言於朝。時挺已就逮。訊之弗實。驗泰等卷。復如式。儼等得免。而瑛倫欽賜舉人。許赴會試。禮科給事中張寧。劾奏循文罪狀。不報。未幾景帝晏駕。循謫戍鐵嶺衛。文棄市。後遇恩宥。二家子姓放還。倫行其字宗彝。竟取進士。而泰以避嫌。終不第甲科。除知荊門州云。近時南京吏部章侍郎綸子元。應舉於京闈。再舉於浙江。事絕與崇嶽相類。

# 雙槐歲鈔卷第六

## 北京十景

北京自元建大都。已有所謂八景。不知何人品題。至我朝太宗文皇帝。因潛淵定天邑。當時翰林諸儒。臣胡廣輩。作八景詩。傳播海內。天順辛巳端午節。英宗睿皇帝。賜文武侍臣以扇。有御製七言古詩十首。凡千一百二十言。卽前所謂八景。曰瓊島春雲。太液晴波。薊門烟樹。西山霽雪。居庸疊翠。玉泉垂虹。蘆溝曉月。金臺夕照。而益以二景。則東郊時雨。南園秋風也。明年壬午。亦以端午賜扇。扇面御製清暑解愠二歌。大概言爲臣者。仰輔上德。俯恤民隱。助隆代天之績云爾。蓋國朝賜常朝官扇。竹骨銅釘鉸。書經傳格言。以示訓飭。越一二月。乃召大僚于內殿。賜象骨銀釘鉸扇。然但畫以物象。其有御製詩。惟此二年爲然。

## 大元洞極潛虛

蔡元定曰。體天地之撰者。至於易而止矣。不可以有加矣。楊氏之太元八十一首。關氏之洞極二十七象。司馬之潛虛五十五行。皆不知而作者也。今攷之太元八十一首。曰中。曰周。曰磻。曰閑。曰少。曰戾。曰上。曰干。曰姤。曰羨。曰差。曰童。曰增。曰銳。曰達。曰交。曰莩。曰後。曰從。曰進。曰釋。曰格。曰夷。曰樂。曰爭。曰務。曰事。天元曰更。曰斷。曰毅。曰裝。曰衆。曰密。曰親。曰斂。曰彊。曰晬。曰盛。曰居。曰法。曰應。曰迎。曰遇。曰竈。曰大。曰廓。曰文。曰禮。曰逃。曰唐。曰常。曰度。曰永。曰昆。地元曰減。曰唵。曰守。曰翁。曰聚。曰積。曰飾。曰疑。曰視。曰沈。曰內。曰



去曰晦曰瞢曰窮曰割曰止曰堅曰成曰闕曰失曰劇曰馴曰將曰難曰勤曰養。人元洞極二十七象曰生曰萌曰息曰華曰茂曰止曰安曰燠曰實。爲天曰資曰用曰達曰興曰紊曰悖曰靜曰平曰序。爲人曰育曰和曰塞曰作曰燥曰幾曰抑曰冥曰通。爲地潛虛五十五行曰元曰哀曰柔曰剛曰雍曰昧曰昭曰容曰言曰慮曰聆曰覲曰繇曰憐曰得曰權曰耽曰苒曰卻曰庸曰妥曰蠢曰詎曰宜曰忱曰詰曰憂曰特曰偶曰睚曰續曰考曰范曰徒曰醜曰隸曰林曰禋曰準曰資曰賓曰戒曰毀曰父曰績曰育曰聲曰興曰痛曰泯曰造曰隆曰散曰餘。今按三家之作大元優矣。邵子以雄知歷之理。最所稱服者。厥後元宥之子沉作洪範皇極內篇亦準卦氣與八十一首同。

夏二子

宋宣和中進士永福吳元美作夏二子傳畧云天命商以伐夏是以伊尹相湯伐桀而聲其刻剝之罪當是時清商颺起義氣播揚勁風四掃宇宙清廓夏告終於鳴條二子之族無大小長少皆望風殞滅殆無遺類天下之民始得安食酣飲而鼓舞于清世矣夏二子謂蚊蠅也其鄉人鄭璋得之往訴秦檜謂其譏毀大臣編管容州尋謫死於南雄按韓昌黎雜詩曰朝蠅不可驅莫蚊不可拍蠅蚊滿八區可盡與相格得時能幾時與汝恣啖咋涼風九月到掃不見踪跡意正如元美所云偶閱鄭文寶江表志楊鸞詩曰白日蒼蠅滿飯盤夜間蚊子又成團每到更深人靜後定來頭上咬楊鸞鸞卽南唐湯悅校文時舉子問欲用堯舜字不知是幾事者也適友人棗陽王進士良璧瑛至相與質之良璧謂曰子謂元美本昌黎安知

鸞不本昌黎邪。二十八字。真非苟作者。元美致禍。而鸞則幸免耳。余曰。子可謂善爲鸞解嘲矣。相與大笑。因書之。

### 曹教諭詩評

松江曹教諭詩評。謂國朝詩不及前代。諸名公似唐人者。惟曾學士槩集而已。入選者亦惟曾詩爲佳。七言以詠物弔古爲難。劉伯溫題二喬圖云。江上桃花紅粉腮。偶然吹入玉堂來。東風日暮和烟雨。多少飄零委綠苔。吉水李子儀墨梅云。詔遣明妃出漢宮。粉香和淚泣春風。玉顏翻作寒鴉色。悔不將金買畫工。詠物弔古使無題。亦難倩也。浙人張庸題陶穀驛亭云。蒼筠織簾湘紋涼。綠羅裁衣蘭麝香。銀燭光搖夜將半。琵琶曲終人斷腸。不必加貶。自有清意。可謂佳作也。四明李照王荆公墓云。天津橋上鵲聲急。已卜先生相本朝。百世雄文凌白日。千年新法苦青苗。富韓國老緣誰去。汴宋基圖自此搖。荒塚臥麟寒食後。東風不見紙錢飄。意則太露矣。且謂國朝詩人不一。佳者多不入選。如李昌祺題文丞相硯云。已矣斯人不可見。留得忠肝涅不淄。千載空遺補天石。一泓正是化龍池。黃簾綠幙承恩日。殘照西風倚馬時。寄語玉堂揮翰手。他年留寫首陽碑。瞿佑題和靖墓云。詩落人間有墓存。誰歌楚些爲招魂。愁憐芳草春無迹。吟到梅花月有痕。華表柱存遼鶴返。少微光質楚天昏。生芻一束人如玉。想像高風酌酒尊。四明張楷觀浙江潮云。當午春雷震海門。初來遠客欲消魂。陳開卽墨牛爭觸。戰罷昆陽馬亂奔。伍相精靈何日散。錢王功業至今存。天涯一點青山小。屹立中流任吐吞。臨川黎擴擬唐宮人入道云。高髻雲鬢罷舊粧。

黃冠初入白雲鄉。碧桃春雨心初定。紅葉秋風怨已忘。行道宛如隨玉輦。步虛清似舞霓裳。多情惟有長門月。來伴吹簫引鳳凰。紹興劉師邵失鸚鵡云。來從西域養經年。飛入青雲最可憐。銀鑿空遺香稻水。雕籠閑鎖落花烟。能言每憶來書幌。學舞長疑在綺筵。此去想應尋舊侶。隴山雲樹尚依然。嘉禾陳延齡岳王墓云。一自班師下內廷。中原渾覺厭膾脰。兩宮環珮烟塵迴。百戰河山草木青。雨暗靈祠嘶鐵騎。月明陰井泣銀瓶。淒涼古墓西湖上。老樹悲風不忍聽。僧德珉姑蘇懷古云。西施一笑破姑蘇。長使行人淚眼枯。輦道落花春走鹿。琴臺明月夜啼烏。夫差古墓迷黃壤。伍相荒祠暗綠蕪。獨有靈巖山色在。崢嶸樓閣屬浮圖。此數詩大類元體。亦未見其進於唐也。振大雅之音。上追漢魏。豈尙有待耶。

禱神弭寇

正統末。吾邑多鬼物。有白晝見形。拋磚弄瓦者。予先府君禱諸城隍。夢神云。時方大亂。可誦妙法蓮華經。覺而飯僧。先府君因誦誦焉。景泰改元。寇果至。先府君在外。予啓神櫝。抱主避之。而寇去。先府君歸。日益諷誦。以函盛經。供奉嚴潔。是年六月。先府君遘疾。十二日。琉璃燈墜。焚函經七卷。燬盡無餘。案棹一無所損。是日先府君捐館。亦異事也。禱神一念精誠。遂致弭寇。故曰心者人之神明。豈待外求哉。

先聖大王

正統改元之春。郡國多蝗。三月。有制分命大臣捕之。工部右侍郎邵旻。往保定。至府西北四十五里。爲滿城縣。縣之南門。有先聖大王祠。父老言。往歲遇蝗。禱之立應。時天久不雨。蝗生徧野。捕之愈盛。旻乃如父

老言帥郡縣吏齋沐禱於祠下。旬月間蝗果殄息。乃勒石以章神功。神姓項名託。周末魯人。年八歲。孔子見而奇之。十歲而亡。時人尸而祝之。號小兒神。史記甘羅傳。項橐七歲爲孔子師者此也。第士人誤謂託耳。曷以大臣精誠不能格天。而小兒妖鬼是禱。亦可笑也已。

### 草廬原理

元草廬先生吳文正公。澄嘗作原理。予愛其稽據明白。分爲上下二篇。其上篇原天地陰陽之理曰。天地之初混沌洪濛。清濁未判。莽莽蕩蕩。但一氣爾。及其久也。其運轉於外者。漸漸輕清。其凝聚於內者。漸漸重濁。輕清者積氣成象而爲天。重濁者積塊成形而爲地。天之成象者。日月星辰也。地之成形者。水火土石也。天包地外。旋繞不停。則地處天內。安靜不動。天之旋繞。其氣急勁。故地浮載其中。不陷不墜。岐伯所謂大氣舉之是也。天形正圓如虛毬。地隔其中。人物生於地上。地形正方如博骰。日月星辰旋繞其外。自左而上。自上而右。自右而下。自下而復左。天之積氣爲辰。凡無星處皆是。猶地之土也。積氣之中有光耀爲星。二十八宿及衆星皆是。猶地之石也。日月五緯。乃陰陽五行之精。成象而可見者。浮生太虛中。與天不相係著。各自運行。速遲不等。天左旋於地外。一晝夜一周匝。自地之正午觀之。則其周匝之處。第二日子時。微有爭差。蓋周匝而觀之。觀天者定其闊狹。名曰一度。每日運行一周匝。而過一度。至三百六十五日三時有奇。則地之午中所直天度。始與三百六十五日以前子時所起之處合。故定天度爲三百六十五度四分度之一。有奇。日亦左行。晝行地上。夜行地下。晝夜一周匝。但比天度。則不及一度。蓋日之行也。

與地相直處。日月齊同。無過不及。而天之行也。與地相直處。一日過一度。二日過二度。三日過三度。故歷家以日之不及天而退一度者。爲右行一度。蓋以截法取其易筭耳。天傾倚於北。如勁風旋繞。其端不動。曰極。上頂不動處。謂之北極。高出地上三十六度。其星辰常見不隱。以偏依於北方。故曰北極。下躋不動處。謂之南極。低入地下三十六度。其星辰常隱不見。以其偏近於南方。故曰南極。南北二極相去之中。天之腰也。謂之赤道。日所行之道。春秋二分。正與天之赤道相直。故其出沒。與地之卯酉相當。是以景短而晷長。晷刻多而夜刻少。夏至以後。又移而南。至秋分。則與赤道相直。秋分以後。行赤道南。冬至則去南極最近。故曰日南至。而其出沒。則與地之辰申相當。是以景長而晷短。晷刻少而夜刻多。冬至以後。又移而北。至春分。則又與赤道相直。日極於南而復北。則爲冬至。至下年日道極南復北之時。三百六十五日餘。三時不滿。故天度一周之時。三百六十五日四分日之一。而有餘。日道一周之時。三百六十五日四分日之一。而不足。天度有餘。日度不足。故六十餘年之後。冬至所直。大率差一度。是謂歲差。月亦左行。猶遲於日。一晝夜不及天一十三度十九分度度之七。蓋日行疾於月。而退度不及天一度。反若遲然。月遲行於日。而退度不及天十三度有奇。反若速然。日之行三十日。五時有奇。而歷一辰。則爲一月之氣。月之行二十九日。六時有奇。而與日會。則爲一月之朔。每日氣盈五時有奇。朔虛六時不滿。積十二氣盈。凡五日三時不滿。十二朔虛。凡五日七時有奇。一歲氣盈朔虛。共十日十一時有奇。將及三載。則積之三十日。而置一閏。日之有餘爲氣盈。月之不足爲朔虛。氣盈朔虛之積。是爲閏餘。五星之行。亦猶日月。其行有遲速。其

行過於天。則爲逆。其行與天等。則爲留。其行不及天。則爲順。日月五星之與天體相值也。由北直南而從分之。謂之度。由東至西而橫截之。謂之道。月之行也。二十九日半有奇。而與日同度。是爲朔。十四日九時有奇。而與日對度。是爲望。合朔之時。從雖同度。橫不同道。若橫亦同道。則月掩日。而日蝕。對望之時。從雖對度。橫不對道。若橫亦對道。則日射月。而月蝕。其食之分數。由同道對道所交之多寡。月朔後初生。明時昏見於庚。下明上暗。象震。上弦時昏見于丁。下明已多。而上猶暗。象兌。望之時昏見於甲。全體皆明。象乾。望後初生。魄時晨見于辛。下暗上明。象巽。下弦時晨見於丙。下暗已多。而上猶明。象艮。晦之時晨見於乙。全體皆暗。象坤。地西北高而多山。東南下而多水。先天方圖法。地乾始西北。坤盡東南。故天下之山。其本皆起於西北之崑崙。猶乾之始於西北也。天下之水。其流皆歸於東南之尾閭。猶坤之盡於東南也。夫陽本實。陰本虛也。陽爲氣。陰爲質。陽成象。陰成形。陽主用。陰主體。則陽反似虛。陰反似實。是不然。天之積氣。雖似虛。然其氣急勁如鼓皮。物之大。莫能禦。故曰健曰剛曰靜專曰動直。則實莫實於天地之成形。雖似實。然其形疎通。如肺氣升降出入其中。故曰順曰柔曰靜翕曰動闢。則虛莫虛於地。然則陽實陰虛者。正說也。陽虛陰實者。偏說也。觀此則理學類編諸書所言渾儀歷法。皆一以貫之。而無遺矣。

### 皇極觀物

邵子皇極經世所論性情形體飛走草木。解之者未有能指其爲何物。祝氏鈴朱隱老集說諸家。皆不能明。亦惟草廬能言之。其原理下篇曰。天有四象。地有四象。日月天之用。星辰天之體。水火地之用。土石地

之體。立天之道曰陰與陽。立地之道曰柔與剛。日陽中陽。月陰中陰。星陰中陽。辰陽中陰。水柔中柔。火柔中剛。土剛中柔。石剛中剛。錯而言則天亦有剛柔。地亦有陰陽。日陽也。月陰也。星剛也。辰柔也。水陰也。火陽也。土柔也。石剛也。日火之精。爲夏之暑。月水之精。爲冬之寒。星體光耀。爲晝之明。辰體昏暗。爲夜之晦。水氣下注而爲雨。火氣外旋而爲風。土氣上蒸而爲露。石氣內搏而爲雷。人稟氣於天。賦形於地。耳目口鼻爲首。猶天之日月星辰也。脈髓骨肉爲身。猶地之水火土石也。心膽脾胃四藏屬天。肺肝胃膀胱屬地。指節十二。合之二十四。有天之象焉。掌文後高前下。山峙川流。有地之法焉。物有飛走草木四類。細分之十六。飛飛者。鴻鵠鷹鷂之屬。性之飛。飛之性也。飛走者。鵝鷄鴨鳧之屬。情之飛。飛之情也。飛木者。隼鳩燕雀之屬。形之飛。飛之形也。飛草者。蜂蝶蜻蜓之屬。體之飛。飛之體也。走飛者。蛟龍之屬。性之走走之性也。走走者。熊虎鹿馬之屬。情之走走之情也。走木者。猿猴之屬。形之走走之形也。走草者。蟻蛇之屬。體之走走之體也。木飛者。松柏之屬。性之木。木之性也。木走者。樟檉之屬。情之木。木之情也。木木者。槭樸荊榛之屬。形之木。木之形也。木草者。楮穀木芙蓉之屬。體之木。木之體也。草飛者。竹蘆之屬。性之草。草之性也。草走者。藤葛之屬。情之草。草之情也。草木者。蒿艾之屬。形之草。草之形也。草草者。菘芥之屬。體之草。草之體也。觀此。似是創自胸臆。他無所據。容或牽合。終不若上篇之純耳。余謂邵子元會運世之說。寅爲開物。戌爲閉物。其源出於佛老。佛氏之書曰。過去名莊嚴劫。現在名賢劫。未來名星宿劫。謂之三世。過去世界磨滅之後。經無量時。有大風起。吹水聚波濤。沸湧生大沫。吹置空中。從上至下。依舊建立天地。久後大海枯

乾天下烟起。漸至磨滅。此卽開物閉物之說也。然猶未詳也。老氏之書曰。天地之數有五。劫。東方起自子。曰龍漢。爲始劫。一炁孕於空洞之中。大無之始。上無復色。下無復淵。混沌溟滓。如龍變化。周流於虛空也。南方起自寅。曰赤明。爲成劫。運推數極。三景開明。猶皇極開物之會也。中央起自卯。曰上皇。北方起自午。曰開皇。俱爲住劫。梵氣彌羅。萬範開張。元綱流演。立天生地。西方起自酉。終于戌。曰延康。爲壞劫。以日言之。爲夜。以人言之。爲死。猶皇極閉物之會也。然則皇極觀物之云者。其殆二氏之緒論哉。

性敏善斷

武城王道亨。士嘉年十八。貢入太學。後就銓爲大同府山陰知縣。性敏善斷。有瞽者齋鈔百緡。醉臥城南荆樹下。覺則亡矣。訴於道亨。道亨曰。此荆樹爲妖也。卽出城按問。民大駭。皆競從之。令人密捕不往者。得一人。倉皇失措。訊之。果服。遂還其鈔而罷。代府內藏失鈔幣。而戶牖封識宛然。莫知其由。王以道亨有知略。召問之道亨。至。察視氣樓。似有物嘗往來。而非人跡。疑爲狙所竊。乃列幣庭中。伺羣狙過而伺焉。一狙果攫取之。因詰其主。主卽款服。盡還之。官自是鄰邑有訟。皆請決焉。母老。就養山陰。嬰疾。忽氣絕。道亨哀號。聲徹天地。母得復蘇。由此治行聲名大著。彙遷方面。正統初。官至禮部侍郎。初。道亨五歲而孤。母教之。聰敏好學。遂爲邑庠生。年十二。已能賦詠。作古塔詩云。浮屠何代建。峭拔入雲端。絕頂登臨處。摩挲星斗寒。鄉先生劉中行見而奇之。曰。寇萊公舉頭紅日之句。不過是也。他日必至公卿。果如其言。

龔指揮氣節



正統十三年二月。福建沙縣民鄧茂七反。先是巡按御史柳華檄各郡縣。凡城郭鄉村大小巷道首尾俱劫一隘門。門上重屋。各置金鼓器械。鄉村大者立望高樓於四隅。小則立於其中。編各鄉民爲什伍。設總小甲。統率之夜。則輪宿重屋。鳴鼓擊柝。不從令者聽總小甲究治。由是總小甲各得自恣。號召鄉人。罔敢違者。茂七與弟茂八皆編爲總甲。嘗佃人田。例於輸租外。餽田主以新米雞鴨。茂七始倡其民革之。又以租輸於遠者。令田主自運而歸。不許輒送其家。田主訴於縣。縣逮茂七不至。乃下巡檢追攝之。因而殺其弓兵數人。縣聞於上司。調官軍三百人。與之格鬪。殺傷殆盡。至是懼討。乃刑白馬。歃血誓衆。遂舉兵反。他縣游民皆舉金鼓器械應之。烏合至十餘萬人。僭稱僞號。署官職。八閩騷動。詔遣都督劉聚爲總兵。都督陳韶劉德新爲左右參將。僉都御史張楷監軍。括蒼賊葉宗留。咋諸途。陳韶與戰。敗死。楷請濟師。十四年。詔以寧陽侯陳懋爲總兵。征夷將軍保定伯梁瑤。平江伯陳豫。都督同知范雄。都督僉事董興。爲左右副參。刑部尙書金濂。參贊軍務。太監曹吉祥。陳梧。監軍。御史丁瑄。張海。紀功。大發兵討之。春二月。師次建寧。而茂七先攻郡城。爲延平官軍所殺。傳聞張楷詩。有句云。除夜不須燒爆竹。四山烽火照人紅。遠近憂歎。初不知茂七之遽死也。已而餘黨推茂七兄伯孫爲主。傳聞茂七果死。始有向前意。於是幕府下令立賞格。能擒殺其黨。與斬敵同。自是擒斬而降者相繼。有老人言賊在尤溪山中欲降。宜遣人撫之。衆莫敢往。惟千戶龔遂榮與致仕驛丞周鑄。毅然請行。遂榮率數騎入深山中。可五六十里。至老人家。或言老人亦賊也。遂榮乃呼老人諭以禍福。老人闔家叩頭謝。因設草具。遂榮與鑄飲食之。意氣揚揚。略不爲勳。食竟。

就馬抵巢穴。盡降其衆而還。賊將張留孫勇而健鬪。自茂七起事。常在行間。伯孫尤倚仗之。遂榮鑄乃寓書留孫。告之逆順。許其自新。使謀佯告若誤者。傳致之伯孫。伯孫果疑留孫。殺之。由是賊將人人自疑。棄伯孫來降。伯孫竟敗。就執賊衆。遂散閩地。悉平。師還幕府。上功兵部。時新被狄難。用事者方大保護京師之功。沮其賞弗行。遂榮好學。善屬文。居貧。授徒自給。征閩。回日。口不言功。默默守故職。而貧益甚。時睿皇帝歸自北狩。尊爲太上皇。居南宮。幽閉如狴牢。至穴牆以通飲食。一時用事諸大臣。方倡與子之說。遂榮獨草疏。請還政于睿皇。疏未上。而語泄。景帝大怒。下遂榮獄。將殺之。會赦。猶杖之幾死。攀不能行者數年。睿皇復辟。始授指揮僉事云。

### 井妖致殞

香山教諭平南張公輝。以廣右解首。自負文學。爲人甚溫雅疎俊。士子敬之。景泰元年。來主師席。忽見廨舍井中。有人紅衣出而招之。輝素有膽氣。呵罵之。走上蓮峯而滅。次日。會飲縣堂。與丞爭坐位。交相拳毆。歸投井死。縣官收斂輝畢。遂填其井。其子孫至今顯貴。豈輝有學行。天子非命。天故報之獨厚歟。

### 旌忠祠

英廟九齡嗣位。寵信司禮太監王振。竊弄威福。或請太皇太后張氏垂簾聽政。不允。一日。召英國公張輔。內閣楊士奇。楊榮。楊溥。尙書胡濙。入見便殿。宣振至前戒諭之。正統壬戌。太后崩。振恣肆。作大宅皇城東。又明年。作智化寺于宅左。以祝釐。自撰碑文。及土木之難。言官劾其擅權誤國。今陷虜中。反爲虜用。籍其

家產。玉盤徑尺者十枚。金銀十餘庫。馬數萬疋。族黨皆坐誅夷。宅沒入官。改京衛武學。天順改元。振黨以聞。上大怒曰。振爲虜所殺。朕親見之。追責言者過實。皆貶竄。詔復其官。刻香木爲振形。招魂以葬。塑像於智化寺北祠之。勅賜額曰旌忠。僧然勝奉其香火。夤緣以孝行被旌。磁州同知龍約。自京還任。以語州人羅綺。時綺以副都御史降參政。家居爲人奏其謗訕。皆獲罪。許學士彬積不平。賦詩曰。忠臣偶爾陷車駕。孝子胡然傷髮膚。智化寺中祠屋上。薊門風峻夜啼烏。

王忠肅公

王忠肅公翱。自總督兩廣軍務。入爲太宰。與內閣李文達最相得。一日偕文達趨召。入文華殿。英廟臨前楹。見之。顧問畢。去。見其衣後穿。呼還。笑問其故。公頓首對曰。臣適在部衣。此聞命。遂不及易。臣聞君命召。不俟駕。而暇易衣乎。賜綺一端。叩謝而出。上益知其誠恪可用。嘗至東閣立候。遙見從行主事。與左順門內豎談笑。公呼之。謂曰。曾讀論語鄉黨篇乎。過位色勃如也。此地近奉天門御榻。豈嬉笑處耶。其敬慎如此。馬恭襄昂代公總督。及入爲大司馬。猶呼其名。恭襄未嘗不敬諾也。夫人爲壻求遷官。至下跪。公叱罵之。終不遷。每遇銓除。人無敢干以私者。主事曹恂。旣陞參議。出至通州。病還。公爲奏聞。有旨仍舊職。恂怨公。遇於朝。猝公毆之。公疑立不動。觀者謂恂必得重罪。公具言恂實喪心。奉旨罷其官。令有司防閑出入而已。景泰時召妖妓李惜兒入宮。優人張甚通同東廠邏者。害及舉子。予在太學。上疏言正身正家六事。禮部奉旨。本無他意。楊興濟善必欲文致予罪。以問公公徐曰。皇上光復之初。乃首罪一監生耶。善報而

止吁公之盛德。何能盡書也。

### 薛尙書論禮樂

天順改元。薛公繼遠。遠自戶部郎中。超拜本部侍郎。從人望也。予上疏時。獲免罪責。公有力焉。尋延子長安西邸。以教其子。每謂予曰。向使禮部說行。子固今之陳東也。然宇宙內事。當視爲性分。子其勉之。公博學無所不通。禮樂兵刑。天官律歷。皆涉其要。嘗出周禮及逸周書示予曰。周禮小祝。有寇戎之事。則保郊祀於社。王安石解保郊所以防患。祀於社所以弭兵。非也。當作一句。謂郊社同在一處。蓋泰壇有三百步。四周爲澤宮。據魏儒劉芳言。則壇有四門。門外爲四郊。觀覲禮。大略可見。故逸周書曰。設大社於周中。當四周之中。立大社。卽澤中方丘。而圓其頂。卽地上圓丘也。大司樂。冬至。以陽聲召陽氣。其律相繼。故天神降。夏至。以陰聲召陰氣。其律相生。故地祇出。合爲九變。陰陽相得。其律相合。故人鬼格。此所謂大合樂。非分祀也。二至演樂。則分陰陽以召驗之。及祀天地。配以后稷。則同在一處。乃坤順承天。合同而化之。義我太祖皇帝。合祀天地。最得禮意。當時耆儒汪克寬。謂祭天必及地。尊可以統卑也。正如人子奉養饋食於父。必及其母。豈可分別哉。觀此二書。則可見矣。其言天官書以日及斗爲主。語多不能盡憶。公本廬之無爲州人。祖祥。洪武中工部尙書。謫海南。因家焉。故舉吾廣鄉試。正統壬戌進士。終南京兵部尙書。最諳國家典故。所履有聲。爲時名臣。

### 張都督不欺

南京僉都督鳳陽張九衢。通文武全材也。初守大同。與石亨同僚。其孫鏞。與亨皆娶武安侯妹。爲友壻。最相得。亨迎駕南宮。時公方在京。使人索賂。將爲公及鏞報功。公執不可。曰。吾實未効勞。敢欺君乎。且貧無以爲獻也。卒辭之。久之。仍舊職。改南京。未嘗介意。及亨敗。冒功陞官者。皆削謫。雖學士黃諫。亦所不免。而公完名高節。竟以壽終。可謂賢矣。公博通經史。尤善吟詠。詞翰傑出一時。大書遒勁有體。予在學時。頗好作詩。公謬見重。期予大用。謂於詞章相貌徵之。嘗爲作坊牌扁及友琴堂大字。今公沒已久。而予碌碌負公。每睹遺墨。爲之黯然。

馬楊二義士

天順中有二義士。曰馬士權。楊墳。初。御史楊瑄劾奏忠國公石亨。太監曹吉祥。侵占民田。上從。徐有貞。李賢言。以瑄不避權倖。命戶部覈實。於是十三道御史張鵬等。合章糾亨不法。兵科都給事中王鉉知之。以告亨。亨入訴。言鵬乃已誅奸臣內官張永從子。故結黨誣臣。上命收鵬及瑄。遂御文華殿。悉召諸御史面詰之。曰。亨若有罪。何不早言。悉下錦衣獄。究主使之者。衛官奏右都御史耿九疇。副都御史羅綺。諷使爲此。併執問之。鞫謂其阿附有貞及賢。主使妄劾。遂下有貞賢於獄。會有風雷雨雹之變。降有貞賢參政。九疇布政使。綺亦參政。御史盛顯等調知縣。瑄鵬俱戍鐵嶺衛。會薛瑄致仕去。欲用王翱。翱薦留賢爲吏部侍郎。亨慮有貞之復用也。令人僞作給事中李秉彝劾奏吉祥過惡。語甚危激。秉彝久臥病。則以貌肖者持上之命。訊秉彝。至死不承。緝捕匿名者甚急。亨因譖有貞怨望。使所親馬士權等爲此而滅其迹。上信

之。遂遣官校捕有貞於途。收士權等。俱下獄。考掠瀕死者數四。士權終無所言。乃摘武功伯誥券。纘禹神功之語。出有貞自撰。實謀作逆。故出語不臣。士權始大呼曰。有貞。忠臣也。豈有自撰誥券。露其逆謀之理。都指揮門達等。竟不能折會承天門災。肆赦。刑部左侍郎劉廣衡等。猶以詐爲制文。當斬奏聞。上有貞犯在赦前。得釋。發金齒爲民。士權亦免。其後門達怙寵驕橫。惡同僚袁彬質直不屈。乃使邏卒發其陰私。考掠成獄。彩漆軍匠楊塤憐之。疏言昔者駕留虜廷。獨彬以一校尉保護聖躬。備嘗艱苦。今卒然付獄。乞御前審錄。則死無憾。併條陳達不法二十餘事。擊登聞鼓以進。上令達逮問。達緩塤死。令誣大學士李賢。主使塤陽應諾。達遽以聞。遂命中官會法司。訊於午門。塤言事由己出。於賢無預。達計大沮。而彬猶降黜。未幾英廟賓天。言官劾達罪。謫戍南丹以死。彬得復官。嗚呼。天下禍機。多由於激。向使瑄言甫行。而鵬等俟其終。則衣冠之辱。未必如是之甚也。主使之套。今猶襲用之。豈成憲然哉。賢之不爲有貞。特天幸爾。吾於二士乎有感。

### 非非國語

宋劉章嘗魁天下。有文名。病王充作刺孟。柳子厚作非國語。乃作刺刺孟。非非國語。江端禮亦作非非國語。東坡見之曰。久有意爲此書。不謂君先之也。元虞槃亦有非非國語。是非非國語。有三書也。同邪異邪。豈紹述而勦取之邪。求其書不可得。蓋亦罕傳矣。今以子厚之書攷之。大率闕庸蔽怪誣之說耳。雖肆情亂道。時或有之。然不無可取者焉。其非滅密也。曰康公之母誠賢耶。則宜以淫荒失度命其子。焉用懼之。

以數。且以德大而後堪。則納三女之奔者。德果何如。若曰勿受之則可矣。教子而媚王以女。非正也。斯乃正論。其可以盡非耶。至其非三川震。曰山川者。特天地之物也。陰與陽者。氣而遊乎其間者也。自動自休。自峙自流。是惡乎與我謀。自闕自竭。自崩自缺。是惡乎爲我設。此則肆情亂道甚矣。是天變不足畏之所從出也。餘類此者。不容枚舉。此所以來三子者之喙與。

# 雙槐歲鈔卷第七

## 金錢銀豆

景泰初開經筵。命太保寧陽侯陳懋知經筵事。戶部尙書兼翰林學士高穀同知經筵事。戶部右侍郎兼學士江淵。學士商輅。侍講學士劉鉉。吏部右侍郎俞山。禮部左侍郎儀銘。兵部右侍郎俞綱。祭酒蕭鎡。左春坊左諭德趙琬。兼經筵官。相傳云。是時每講畢。命中官布金錢於地。令講官拾之。以爲恩典。高穀年六十餘。俯仰不便。恆莫能得。有一講官忘其氏名。常拾以貽之。有識者病其媿瀆。時宮中又賜諸內侍以銀豆等物爲閨笑。楊文懿公守陳時在翰林。賦銀豆謠曰。尙方承詔出九重。冶銀爲豆驅良工。顆顆勻圓奪天巧。朱函進入蓬萊宮。御手親將十餘把。琅琅亂灑金塔下。萬顆珠璣走玉盤。一天雨雹敲鴛瓦。中官踈拾多盈袖。金璫半墮羅裳縵。贏得天顏一笑懽。拜賜歸來坐清晝。聞知昨日六宮中。翠娥紅袖承春風。黃金作豆競拾得。羊車不至愁烟空。別有銀壺薄如葉。并刀翦碎盈丹匣。也隨銀豆灑金塔。滿地春風飛玉蝶。君不見民餐木皮和草根。夢想豆食如八珍。官倉有米無銀糴。操瓢盡作溝中瘠。明主由來愛一嘸。安邦只在恤窮民。願將銀豆三千斛。活取枯骸百萬人。於乎國阜用汰。至此極矣。

## 黃寇始末

南海賊黃蕭養者。冲鶴堡人也。貌甚陋。眇一目而有智數。坐強盜在郡獄。逾年。所臥竹牀。皮忽青色。漸生



竹葉同禁者江西一商人也。曰：此祥瑞也。因教以不軌，使人藏利斧飯桶中，破肘鐮，越獄而出。凡十九人，商人遂逸去，不知所在。官隸獄卒追之，揮斧而行，人莫敢近。其黨駕船以待，遂入海潛遁。正統十三年九月也。於是嘯聚羣盜，赴之者如歸市。旬月至萬餘人。十四年八月，攻圍郡城，官軍禦之，輒爲所敗。城中餓死者如壘，製雲梯，呂公車衝城，幾爲所破。設開都僞官，招誘愚氓，漸至十餘萬。都指揮王清，自高州引兵赴援，至廣舟膠淺水，有小艇載柴及鹽魚者，奔迸若避賊狀。官軍問蕭養所在，言未脫口，伏兵出柴中，擒清，盡殲其軍。城中震恐，三司官登城望之，刃矢森發，相顧涕泣而已。聞道告急，驛至京師，詔遣都督董興總兵都指揮同知姚麟副之，兵部侍郎孟鑑僉都御史楊信民督其軍，尋命信民巡撫廣東。賊旣屢勝，遂僭稱東陽王，改元，授僞官者百餘人。據五羊城爲行宮，四出剽掠，信民舊爲廣東參議，將至，賊衆漸散。景泰元年春，興等進兵，時天文生馬軾隨行至江西，夜半聞雞，興問之曰：此何祥也？對曰：雞不以時鳴，由賞罰不明。願公嚴軍令，及經清遠峽，有白魚入舟中，軾曰：武王伐紂，有此徵應，此逆賊授首之兆也。時蕭養聚船河南千餘艘，其勢甚張，衆欲請兵，軾曰：兵貴神速，若請兵，則緩不及事，以所徵兩廣江西狼兵取勝，猶拉朽耳。興從之。三月初五夜，有大星墜于河南，及旦，以所占告曰：四旬內破賊必矣。四月十一日，興帥官軍至大洲頭，與賊遇，果大破之。時信民使人齎榜諭賊使降，蕭養曰：楊大人我父母也，當徐思之。獲鉅魚爲獻，信民受之，立斫數十段，頒於有司，賊出而嘆曰：勢不佳矣。叛蕭養者漸多，畱者不滿一千。會信民中毒卒，鑑乃益加招徠，蕭養中流矢而臥，爲官軍所擒。於是奏捷于朝，蕭養伏誅，餘黨悉平，詔鑑代信民。

巡撫。乃析南海冲鶴大良諸堡爲縣。名曰順德云。

### 王清羅難

王清字一寧。濟寧衛指揮。慷慨多勇略。常提兵入衛。宣德閒。率所部出喜峯口。及至鴛鴦海。覘虜。累立奇功。曾有句云。落日龍荒覘虜還。劍光直射斗牛寒。少年氣節應無敵。肯負平生一寸丹。正統丁巳。陞廣東都指揮。以親老不遂迎養。陳情乞分俸於原衛。詔許之。蠻夷叛。據大藤峽。清往討。有功。戊辰。總督廣東軍務。己巳。協同總兵駐軍高州。廣賊黃蕭養。劫鄉民叛。衆十餘萬。圍攻廣州。清帥舟師赴援。至沙角尾。水淺舟膠。失利被執。賊素知清威望。不敢害。清投水不死。因寄衣還廣城中。大書詩云。兩捧天書鎮百蠻。偶因兵敗不生還。飄零身世輕於葉。磊落襟懷重似山。半夜愁吟珠海寺。幾回夢墮鬼門關。憑君獨有衣相寄。爲我招魂宇宙閒。數日。賊擁清至城下。使諭衆開門降。清罵賊不絕。遂遇害。有建囊集行於世。

### 太宰上壽

南京吏部尙書魏文靖公。驥天順甲申。遇憲廟卽位。詔文武官員五品以上致仕者。進階一級。時年九十。一歲。進一品官階。閒居述懷詩云。迂疎不覺已成翁。鎮日優游雨露中。一品新陞遵紫詔。百年將屆荷蒼穹。松楸入望山逾麗。禾黍連雲歲又豐。感激天恩深似海。沾濡能有幾人同。至己丑元日。年九十六。詩云。白頭又喜換年華。香藹清芬燭吐花。宮錦任披隨所戀。椒觴從泛不須賒。年登上壽身逾健。官拜深恩秩更加。願祝堯年等天地。華夷一統慶無涯。庚寅元日。年九十七歲。詩云。家家簫鼓慶新年。老我風情只自

然庭竹禁寒呈晚翠。牕梅和雪獻春妍。酒香旋漉延佳客。詩就清吟續舊編。最喜康強勝去歲。從人說是地行仙。辛卯元日。年九十八歲。詩云。骨肉團圞子與孫。升平又喜沐晨昏。江河合派歸溟渤。夷夏同心仰舜文。粲粲呈春梅吐玉。欣欣歲客過門。老臣白首栖蓬華。只效封人祝至尊。秋夜閒居詠懷云。步玉登金鬢已霜。天恩乞得老江鄉。蓋隨分猶鐘鼎。泉石長甘卽廟廊。雅素欲追陶靖節。疎狂又學賀知章。百年已屆殊康健。任樂唐虞化日長。九月十九日病中臨終詩云。汨汨華池水漸來。今朝懷抱覺還開。上蒼未必重頒福。殘喘何期更復回。瑤島不勞青鳥至。菊籬還許白衣來。明當放棹西湖去。翠水丹山喚作陪。官至一品。可謂尊矣。年近百歲。可謂壽矣。國朝大臣罕與之儷。期蓋作詩。固不暇計其工拙也。

南苑射獵

京城南有苑。苑中有按鷹臺。臺旁有三海。皆元之舊也。本朝稍增治之。自太宗定都以來。歲時蒐狩于此。天順戊寅孟冬朔旦。朝退駕出。旣入苑。上由中道。從臣分道。由左右會於臺下。時日加午矣。長圍漸合。羽毛畢集。上親御弓矢。命中勳戚武將。應詔馳射。獲輒獻之。旣畢。賜酒饌。以所獲分贖從臣。命之先歸。上御飛轎後至。是日天氣明霽。風埃不驚。歸途見月。馬騰人樂。學士劉定之詩云。聖明天子中興年。大閱軍容故卜畋。射雁得書卑漢武。貫魚入詠邁周宣。追風玉勒從晨出。吹月金笳及暮旋。有獲應爲王者佐。屬車命載着先鞭。

布衣進心學圖

漳州布衣陳剩夫。真晟天順二年。用伊川故事。詣闕上程朱正學纂要。其書首採程氏學制。次採朱子論說。補正學工夫。次作心學二圖。其一爲天地聖人之圖。大書一心字。以上一點規而大之。中虛曰太極。太極左曰靜。右曰動。太極前一字。倒朝上曰復。靜作十六點黑。動作十六白。蓋太極生兩儀也。自是如旋螺狀。凡十點。彎而向左。又各作十八黑白點。如前而大。每一大點。包二卦。蓋自二而四。自四而八。自八而十六。自十六而三十二。自三十二而六十四。卽邵子先天圖也。坤復在下。書冬至。乾姤在上。書夏至。升訟爲義。曰立秋。咸遯曰秋分。否謙爲正。曰立冬。明夷無妄爲仁。曰立春。臨同人曰春分。履泰爲中。曰立夏。蓋兼太極而一之也。其一爲君子法天之圖。亦大書一心字。其上一點規而大之。視前差小。中虛曰敬。敬左曰靜。右曰動。前一字朝上曰復。靜之左。半黑而白。白復黑。動之右。半白而黑。黑復白。卽太極圖之陰陽動靜也。然白黑皆互圓相入。與太極稍異。上曰乾。下曰坤。左曰坎。右曰離。坎之左曰靜。主動。離之右曰動。主靜。乾之上。書聖要四說。曰主一無適。曰整齊嚴肅。曰常惺惺法。曰其心收斂。不容一物。蓋採朱子之說。亦合先天太極爲一者也。總爲之說曰。右圖二。一著天心動靜之本然。是性之原也。一著君子法天之當然。是性之復也。聖人亦天心之自然者也。君子豈可以不學乎。然復性之說。經傳詳矣。而未有如此後一圖義之要而盡者也。惟君子知之。又能主敬以體之。以盡其法天之功效也。而有序焉。蓋始則主敬。使一動一靜互爲其根。卽致知誠意之事。是始學之要也。固不外此一圈。終則敬立。而動靜相根。明通公溥。卽知至誠意之事。是爲聖功之成也。亦不外此一圈。而自始至終。則皆不離乎敬焉。如是則法天之功。至與前一

大圈同一渾然粲然而無閒矣。一敬之功用如是。豈不大哉。三代學校之所以教者。惟此而已。此非後世記誦俗學之所能與也。自伏羲畫卦示精之後。卦即復堯以是欽傳之舜。舜以是恭傳之禹。禹以是精傳之湯。湯以是日日傳之文。文即武。武成周公旦待孔子約孔子傳之顏齋曾一一貫思性性。孟子求放及孟氏沒而遂失其傳者此也。寥寥千餘載。至周程張朱氏出。然後此學大明。及朱氏沒而後晦者。只由宋元學校。雖皆用程朱之書。而取士又仍隋唐科舉。是以士視此心學爲無用。故多不求。又失其真傳焉。今幸聖明崇重聖學。學校探程朱之議而用之。則心學之傳。可以繼朱氏矣。夫象理甚明。不煩解剝。但能體此下學之功。主至於得其上達之妙。太極全體則此圖在我。雖四書五經。無復遺理。蓋祇是吾所得於天之本心。而聖聖相傳者也。其至要而廣大悉備。孰有加於是哉。故宜朝夕敬觀。且樂與同志者共焉。而尤望有以是正之。後書吳南布衣陳真晟述非進呈體也書未上。先疏乞召見而陳其說。不報。及書上。得旨下禮部。時侍郎鄒幹掌部事。不知其說云何。其事竟寢。

壽星塘

宋廣東經略使蔣之奇。嘗作蓬萊仙傳。陳仁嬌。香山陳氏女子也。自少絕粒。修鍊成仙。身輕。能從諸仙飛遊四方。嘗降廣州進士黃洞家。今吾邑惟壽星塘山水幽勝甲一邑。有物曰赤蝦子者。如嬰兒而絕小。自樹杪手相牽挂而下。笑呼之聲。亦如嬰兒。續續垂下。甫至地而滅。人謂蓬萊仙女遺類也。予竊謂不然。蓋土石之性。夔魍魎耳。又有大鴉。高七八尺。立與人齊。見肉食。卽啄去。景泰元年冬。予葬先考妣於此。人蹤

日多二物日少。因思劉靜修詩云。人道乖張鬼道侵。若人盛則鬼衰。亦乘除之數。天地自然之理也。

### 蓮峯卿雲

景泰丙子仲秋朔旦。邑庠行香後。忽見五色雲出於蓮峯之上。霏靄亘天。黃彩爲多。予時在廣同舍鄭賢。領批居首。自負時名。其讀書自扁元吉齋。作詩有元吉協黃裳之句。予竊哂之。因次韻云。蓮岫倚空蒼。卿雲忽降祥。九霄懸錦綺。五色煥文章。遠靄兼山碧。非烟帶日黃。虞廷如可獻。將補舜衣裳。此上瑞也。豈吾人所敢當耶。

### 登科夢兆

予應景泰七年鄉試。七月時同鄭賢李濬。自石岐登舟。忽千戶林興來送。揖賢及予曰。興夢最驗。恭喜二位。俱登第矣。鄭秀才名在前列。但山字上如盧狀。殊不可識。豈傳臚之兆邪。黃秀才中五十七名。夢中見之甚真。濬不悅。佯醉而臥。興遂辭去。及揭曉。予叨領薦額。恰如其數。有鄭賢在予前。乃靈山人也。

### 湯陰精忠廟

湯陰縣西南有岳武穆王精忠廟。正統末。大學士徐武功有貞所建也。其碑文曰。國之有忠義。猶天地之有元氣。天地非元氣不運。國非忠義不立。天地之主以道。國之主以人。道無私而人多欲。故天地不自害其元氣。而國有自害其忠義者。至要其終。則亦有萬世之公論存焉。如宋岳武穆王是已。當徽欽之既北狩。而高宗南渡也。華風幾淪。戎禍方熾。宋之亡。猶如一綫之屬旒。國之無人。誰與復立。王於時奮自徒。

步應募而起。歷裨校至大將。小戰百餘。大戰數十。鋒不少挫。而益勁。遂平南北羣盜。傾僞齊。以蹙金人。蓋王之忠義勇智。皆得之天。非矯僞而爲者。故以恢復爲己任。才與忠副。名與實稱。南渡以來。一人而已。當是時。女真幾滅。中原幾復。奈何主蔽於奸。忘讐忍耻。自棄其土。而不能成中興之大功。此則宋之不幸。中國之不幸。而豈獨王之不幸哉。論者謂方郾城戰勝。進軍朱仙鎮。兀朮將棄洛遁。詔趣班師。使王持將在軍。君命有所不受之義。堅執北伐。乘屢捷之勢。逼技窮之虜。而滅之。盡收故疆。措置已定。然後奏凱旋師。歸身謝罪。顧不愈於束手就僂。而志不得伸邪。此亦一義。然未得其當也。夫將不專制久矣。惟趙充國之破西羌。嘗違詔而伸己策。以上有孝宣之明。下有魏相之忠。與協耳。不然。則必如孔明之受託。昭烈。桓溫。劉裕之專制。晉權乃可。彼高宗之去孝宣遠矣。又濟之以奸檜之賊。王旣無孔明君臣之契。而裕溫又非王之所肯爲者。此所以寧死而不敢專制也歟。烏乎。於此可以見王忠義之誠矣。是以自宋及今。天下之人所共扼腕傷歎。聲其害王者之罪。而誦王之烈不已。非所謂公論之存於萬世者乎。歲己巳八月。皇帝初卽大位。以統幕師燿。上皇未復。寇方內偪。乃命侍講臣瑄等十有五人。分鎮要地。遏亂略。糾義旅。以爲京師聲援。而臣瑄實來彰德。彰德古相州也。湯陰爲其屬邑。邑之周流社王之生地也。閒因行縣至焉。旣臨祭王之父祖墓。而封守之。乃集郡縣僚吏師生父老於庭。而諭之忠義。及王之祠事。皆憲躍願効力。其明年春。瑄以召還。乃具列王之功於禮當祀者以聞。詔可。祠旣成。勅賜榜曰精忠廟。而俾有司春秋祭享。如制。於是書其事於麗牲之碑。而識其相事者之職名于碑陰。碑文內理。卽武功之初名也。立齋宋憲副。

端儀常著岳飛班師論。正謂王知變而不知權。一時士子翕然聽之。予獨致疑。以爲不然。今觀武功之論實與予合。乃知義理。故人心之所同然也。當時使王行權而不守正。違君命以前征。軍士心必解體。誰與爲戰。而高宗奸檜。亦有辭矣。是自棄其師。兼敗其身也。一失其正。萬惡皆歸。王豈肯爲哉。故錄武公之文。以竢斷史者採焉。

### 岳武穆遺詩

覽池州府志。得岳武穆遺詩二章。皆精忠錄所未收者。題齊山翠微亭云。經年塵土滿征衣。得得尋芳上翠微。好水好山觀未足。馬蹄催趁月明歸。題池口樂光亭云。愛此倚闌干。誰同寓目閒。輕陰弄晴日。秀色隱空山。島樹蕭颺外。征帆杳靄閒。予雖江上老。心羨白雲關。

### 理宗本生系

宋史理宗紀。不著本生世系。獨於宗室表見之。按燕王德昭生冀王惟吉。惟吉生盧江侯守度。守度生嘉國公世括。世括生房國孝恪公令稼。令稼生修武郎子奭。子奭生伯旡。伯旡生師意。師意生希瓚。希瓚生理宗。若濟王竑。則秦王德芳之後。德芳生惟敘。惟敘生從溥。從溥生世堯。世堯生令畋。令畋生子乙。子乙生伯存。伯存生師丑。師丑生希瞿。希瞿生竑。於寧宗爲近屬。故當時立竑爲皇子。而以理宗後榮王者。蓋親疎之殺云。

### 莊周亂名實



偶讀莊周之書。觀其論事之體。如懸河立海。電馳霆擊。龍蛇走陸。而雲烟綺天。令人驚喜而不能已。至其荒唐誕放。啓天下後世亂名實而紊載籍。是則可以憑怒也。周之罪大矣。蓋其稍據實事。附入己說。如接輿之歌者是也。而聖賢行跡。自此不足信。詭爲姓名。恣其伸喙。如肩吾連叔之問答者是也。而古人姓名。自此不足信。虛實相半。是非交雜。如意而子問許由。仲尼見老聃之類是也。而天下實理。自此不足信。自周之書行。而古今之事。紛糅顛錯。虛實混爲一途。而不可盡識矣。其尤甚者。則姓名之詭撰。足以眩人之聽聞。非若事跡之尙可稽也。余嘗謂編輯類書。當分實事寓言二科。以精別之。斯爲無弊。且以小說諸書攷之。如牛僧孺之元怪錄。郭元振烏將軍事。本寓言也。祝穆於事文類聚。則以爲實。魏泰之碧雲殿。所載司馬光營妓事。本謗詆也。陰復春於韻府羣玉。則以爲實。龍城記所載趙師雄夢梅花事。本戲筆也。惠州志。則以爲實。梁四公記所載姓名。本不知所據也。王應麟於姓氏篇。則以爲實。開元天寶遺事。所載張彖冰山事。有無本不可知也。資治通鑑。則以爲實。似此之類。未易枚舉。邈其所自。則莊周啓之也。六經語孟之書。瑩潔純粹。有其事。則書。未有詭撰其事者。有其人。則書。未有詭撰其姓名者。經於秦火。壞於漢儒。蓋猶有致疑於其閒者矣。然則小說孟浪無稽之浮談。其可據以爲實乎。故嘗以爲自六經語孟諸儒正說之外。大半皆烏有無是公也。豈非莊周作俑之罪哉。

薛文清公德學

內閣學士河東薛文清公。瑄名德碩學。海內推重。嘗爲御史。巡按山東。建言謂內外風憲。緘默不言。顧都

憲佐惡之後公考滿願署下下不稱職坐是不得進階及封贈父母公未嘗介意少見於顏色其涵養可知也。景泰辛未秋七月以大理右寺丞乞致仕。戶部侍郎兼翰林學士江公時用淵言於上曰。薛瑄歷官罷而復起。始終不易其操。昨者奉命督四川雲南糧餉。以給貴州之師。日夜勞心。思竭筋力。以底有功。今年纔踰六十。耳目聰明。未覺衰耗。臣愚以爲瑄之學之才。宜置之館閣。以資其助。不宜俯徇其情。聽之去也。於是詔留復職。尋陞南京大理寺卿。未幾果入內閣。時論方重。顧公以江公愛惜人材之心較之。其優劣何如也。天順丁丑。薛公主會試。未幾去位。予在太學。往謁送之。以復性爲問。因質以繼善成性。與相近之義。剖析分明。謂繼善卽天命。成性卽氣質。孟子指天命本然說。孔子兼論氣質。其說乃備。德容溫辟。言詞質直。眞君子人也。忽一客至。予辭而出。同舍王舉人玆嘗以史中諸疑誤質之。如宋太祖授受事。公尋思。徐曰。多聞闕疑。若此闕之可也。蓋確論云。

### 邨邸官寮

正統庚申。景皇在邨邸。吏部奉勅擇儒臣爲官寮。人皆托故避之。其不得已就者。翰林侍講東萊儀銘爲左長史。修撰吳郡楊燾爲右長史。訓導嘉興俞山。晉江楊輿爲伴讀。中書舍人金陵俞綱爲審理。正。南昌余儼。太原朱紱爲審理副。皆不由科目者。及王卽大位。首擢二長史皆侍郎。銘終太子太保。兵部尙書。燾終禮部尙書。山爲鴻臚左寺丞。歷少卿。吏部左右侍郎。輿爲戶部郎中。陞南京戶部侍郎。綱擢太僕少卿。晉兵部右侍郎。且竊居內閣。月餘罷。儼遷僉都御史。紱遷大理少卿。人之功名富貴。不可豫料如此。綱字

廷立嘉善之胥山鄉人。後徙金陵。無他材能。以生員薦入翰林。預修宣廟實錄。得中書。後驟進。得與密勿。人詫爲異。英皇復辟。加太子少保。仍兼侍郎。改南京禮部。致仕。快快病卒。其遭逢可謂過分。而綱猶不自足。有女爲柯狀元繼室。每述其父缺望之言。殊可笑也。

彭蠡纜精

天順初元。予計偕北上。經彭蠡湖。舟人言宗三秀才靈異。當具牲醴求神福者。問之。扣齒搖首不敢言。既望奠後。乃言曰。昔聖祖之鏖戰僞漢也。有棕毛巨纜。分判爲三。歲久化爲蛟龍。宗一。宗二。飛騰而去。獨其季弟淹留在此。每蜿蜒波濤中。舟人稍欠修敬。遇之輒有禍敗。或化爲丈夫。題詩作讖。後無不驗。予大不然之。後告往南監。再經其地。則妖已熄矣。時都昌孔知縣韶文。鏹者。最號廉能。偶歲大旱。聞其出沒。乃往驗之。一巨木歲久爲水草交絡。眞若鱗鬣然。笑曰。宗三秀才。乃汝耶。命左右秉炬焚之。了無他異。韶文由是聲名大著。累官至右副都御史。工部侍郎。系出先聖。家于姑蘇。景泰甲戌進士。

絕句近唐

景泰甲戌。選進士十八人。改翰林庶吉士。入館。修寰宇通志。書成授官。首則邱文莊公。次則彭學士。尹學士。直俱編修。而牛綸以太監。玉姪亦與焉。授科道者。吾鄉東井陳先生政。及耿裕。金紳。劉釭。孟勳。嚴。淫。何琮。甯珍。陳龍。黃甄。王寬。吳禎也。修書兼攻課業。惟此科爲然。彭長於絕句。詠陶淵明云。解印歸來雪鬢飄。呼兒滴露寫前朝。丁寧莫取江頭水。恐是金陵一夜潮。題王明妃云。抱得琵琶不忍彈。胡沙獵獵雪

漫漫曉來馬上寒如許。信是將軍出塞難。風味近唐人矣。

古廉絨織錦圖

蘇若蘭織錦回文璇璣圖記

仁智懷德聖虞唐。真妙顯華重榮章。臣賢惟聖配英皇。倫匹離飄浮江湘。津傷嗟情家。明葩榮志庭闈亂。作人讒佞奸凶害我忠。貞桑凶慈雍思恭。碁河慘歎中無鏡。紛爲篤明難受消源禍。因所恃恣極驕盈。榆頑孝和淑自爲隔懷。懷傷君朗光誰終榮。苟不義。姬班女婕妤辭。輦漢成薄漫休家。貞記孝塞慕所路房。容珠感誓城傾在戒后。孽嬖趙氏飛燕實。生景讒退遠敦貞。敬殊增離曠。幃飾曜思穹。熒猶炎盛興漸至。大伐用昭青青昭。愚謙危節所是山。憂經遐清華英多蒼形。未在慎深慮。微察遠禍在防萌。西滋蒙疑容。持從梁心荒淫妄想。感所欽岑幽巖峻。嵯峨深淵重涯。經網羅林光流電逝。推生民堂妃闈飛衣誰追。何思情時形寒歲識凋。松愆居歎如陽移。陂施爲祇差生空后。中奮衰爲相如感傷在勞貞物。知終始舊獨懷何潛西不何誰神無感。惟自節能我容聲將自致。君想顏喪改華容。是爲女賤曜日月激與通者曠思興厲不歌治同情寧。致側夢仁賢別行士念誰賤鄙。翳白無憤將上採悲詠風。樊歎歎發觀羽纏龍旂容衣。詩情明顯怨哀情時傾。英殊衰殊身節非路和周楚長雙華宮。憂虎彫飾繡始璇璣圖。義年勞歎奇華年。有志飭志葑長音南鄭。歌商流微殷繁華觀曜終始心詩興感遠殊浮沉時盛意麗哀遺身藏邵衛詠齊。曜情多文曜壯顏無平蘇氏理往憂歲異浮惟必心華惟下微摧伯女志興榮傷患藻榮麗充端比作麗。

辭日思慕世異逝。倏違榮感體。憫悲窈河遐。碩翠感生嬰。漫丁寃。詩風興鹿鳴。懷悲哀。誰遊條無一。俯憂作已聲。窈廣路人粲。我艱是漫。是何桑翳感。孟宣傷感情者。頽然盈體。仰情者處發。淑思透其威。情惟憂何艱。生時盛。昭業傾。思永戚。我流若不忠。容何成。幽幽姿歸。迥頽蕤。悲苦我章。徽恨微元。悼歎戚知。沙馳虧離儀。貲辭房。秦王懷土。眷舊鄉。身加兼愁。悴少精神。遐幽曠。遠離鳳麟。龍昭德。懷聖皇。人商遊。桑鳩揚仇。傷榮身。我乎集。殃愆辜。何因備。嘗苦辛。當神飛。文遺分。歸賤絃。西翳雙。激好摧。君深日。潤浸愆。思罪積。怨其根。難尋所。明輕殊。孤乖鷹。爲激階。陰巢水。悲容仁。均物品。育施生。天地德。貴平均。專通身。粲妾殊。翔女楚。步林燕。情思發。離濱漢。之步飄。飄離微。隔喬木。誰陰一。感寄飭。散聲應。有流東。桃飛泉。君歎殊。心改者。惑暱親。聞遠離。殊我同。衾志精。浮光離。哀傷柔。清廓休。翔流長。愁方禽。伯在誠。故遺舊。廢故君子。惟新貞。微雲輝。羣悲春。剛琴芳。蘭凋茂。熙陽春。牆面殊。意惑故。新霜冰。齊潔志。清純望。誰思想。懷所親。四圍縱橫。初行八行。十五二十二二十九行。及仁嗟斜。至春親。琴廊斜。至基津。以朱畫。其形如織。按讀法。此色凡三圖。餘四色。色各一圖。共詩三千七百五十二首。四隅嗟情。至英多。遊桑至長愁。神飛至悲春。凶慈至持從。縱橫皆六字。以墨畫。正面妃圍。至蕤悲。移陂至貲辭。縱六字。橫十三字。兩旁庭闈。至防萌。身我至惟新。縱十三字。橫六字。以青畫。中方面龍旗。至麗充。衰情至慕世。縱四字。橫五字。兩旁寒歲。至行士。詩風至微元。縱五字。橫四字。以紫畫。中方四隅。思情至側夢。嬰漫至若我。愆居至賤鄙。懷悲至戚知。縱橫皆四字。又中縱合五字。詩情至顯怨。端此至麗辭。橫各五字。詩始至無端。怨義至理辭。空中心璇璣圖始。

平蘇氏以黃畫。

古廉李祭酒時勉敍曰。扶風竇滔妻陳留令武功蘇道賢第三女也。年十六。適滔。滔爲苻堅秦州刺史。有能名。後以事忤堅。謫戍燉煌。及堅取晉襄陽。擇守。復起滔。拜安南將軍。鎮襄陽。始滔有寵姬趙陽臺。善歌舞。寘於他所。蘇氏偵知之。求而加捶楚焉。滔頗恨之。陽臺又媒蘖蘇氏短。而讒諸滔。由是情好日疎。暨滔赴襄陽。邀蘇氏與俱。忿不肯從。遂攜陽臺以往。絕蘇氏不復與通音問者久之。蘇氏忿恨。不得以伸其思。乃織錦爲回文。遣家僮徧鬻之。期至滔所。欲以感動其意。滔覽之。不釋手者數日。乃得探其憂鬱之情。而悲傷之。遂送陽臺之關中。具車從。迎蘇氏至襄陽。恩愛益篤。於初。吾友黃君卓持此圖以示余。余感夫世之惑讒邪以害正。被謗以自屈者。曾不如蘇氏之善諷。滔之能悟。而由其正也。特爲賦詩云。蘇氏名蕙。字若蘭。滔字連波。右將軍子真之孫。朗之子也。今觀此詩。三言似急就。四言似千文。五七言似古選。首言娥英。以比嫡妾。中及飛燕。以比陽臺。出入經史。反覆成文。事林廣記所載。末云願放兒夫及早還者。其賈可知矣。